

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR THIRD SITTING ON THURSDAY, THE 22nd FEBRUARY, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **PU LALDUHOMA**, hon. Chief Minister to lay on the Table of the House a copy each of the following :
 - i) Finance Accounts 2022-2023 Vol.-I relating to Government of Mizoram.
 - ii) Finance Accounts 2022-2023 Vol.-II relating to Government of Mizoram.
 - iii) Appropriation Accounts 2022-2023 relating to Government of Mizoram.
 - iv) Report of Director of Local Fund Audit on the Accounts of Local Authorities for the year 2018, 2019-2021.
3. **PI LALRINPUII**, Minister to lay on the Table of the House a copy each of the following :
 - i) Zoram Medical College Memorandum of Association, 2024
 - ii) Zoram Medical College Regulations, 2024
 - iii) Bye-Laws of Zoram Medical College, 2024
 - iv) Zoram Medical College (Recruitment & Conditions of Service for Teaching Faculty) Rules, 2024
 - v) Zoram Medical College (Recruitment & Conditions of Service for Non-Teaching Employees) Rules, 2024

LEGISLATIVE BUSINESS

Bill for introduction, consideration and passing.

4. **PU PC. VANLALRUATA**, Minister to beg leave of the House to introduce "The Mizoram Water Resources (Management and Regulation) Bill, 2024"

Also

to introduce the Bill

to move that the Bill be taken into consideration

AND

to move that the Bill be passed.

VANLALTHANTLINGI
Commissioner & Secretary

HON. SPEAKER : *Roreltute hnenah chuan, 'In thiltih chu ngun taka ngaihtuahin ti rawh u; mihring tana rorel in ni lo va, LALPA tan a ni zawk si a; rorelnaah chuan in hnenah a tel zel a ni.*

Chuvangin, LALPA hlau ula, fimkhur takin ti rawh u; LALPA kan Pathianah chuan khawlohna leh thlei bik neihna leh tham einate a awm lo a ni' a ti a.

-2 Chronicles 19:6 & 7

Vawiin hi ni duhawm tak mai a ni a, kan House Leader, kan Chief Minister zahawm tak Pu Lalduhoma piancham phak kum 75-na a ni a. Kum 75-na hmel la hmu lo deuh vek kan nih ka ring a, khawngaihin a awm hmunah min lo din sak sela. (*Hon. Speaker ngennain a awmhmunah kan CM a ding a ...*)

A lawmawm e. Pu Lalduhoma, kan House Leader zahawm tak, I theihna te, i finna te Zoram-mipui tan leh he House tana hman zel turin House-in duhsakna kan hlan a che.

Vawiin hian member rawn kal remchang lo kan awm nual mai a. Pu Lalchhuanthanga, Member zahawm tak hi rokhawlhna avangin a rawn kal thei lova; Pu Lalmuanpuia Punte hi eng emaw tulna avangin chawhma a rawn kal thei dawn lo bawk a; Pi Baryl Vanneihsanghi hi nimin a haw atang khan a khua a sik a, damlohna avangin a rawn kal thei lo dawn bawk a ni. Tin, nimin absent-ah khan tih dik ngai a awm a - Nimin absent 'Pu K. Hrahmo' kan tih kha Pu Ngunlianachunga zawk a ni e.

QUESTIONS & ANSWERS:

Tunah chuan, *Zawhna & Chhanna* ah kan kal dawn ang a. Hun te a rei loh zawk nan lut nghal mai ila a tha ang e. *Starred Question No. 21* - zawt turin Mamit Bialtu Member Pu H. Lalzirliana i lo sawm ang u.

Starred Question No. 21 - *Tuipuibari PHC chungchang.*

PU H. LALZIRLIANA : Pu Speaker, Zawhna ka zawh hmain, kan Chief Minister, kan House Leader zahawm tak ni bawk hi Birthday chibai ka buk a, *I wish you a many many happy returns of the day.*

Ka zawhna, Minister zahawm tak Health & Family Welfare Department changtu chhan atan -

“Tuipuibari PHC hi engtikah nge a function tan theih ang?” tih a ni e.

HON. SPEAKER : Chhang turin Pi Lalrinpuui, Minister zahawm tak i lo sawm ang.

PI LALRINPUUI, HON. MINISTER: Pu Speaker, ka lawm e. He House zahawm taka Member Pu H. Lalzirliana zawhna ka chhanna chu -

Tuipuibari PHC hi tun sorkar term chhung ngei a function tir tum a ni. Health facilities list – Gazette, 2021, Mamit District chhunga Primary Health Centre list ah pawh telh a ni. Ka lawm e.

HON. SPEAKER : A zawhna neitu khan zawhbelhna a nei em aw? I lo sawm ang.

PU H. LALZIRLIANA : Pu Speaker, ka *Zawhbelhna*, (tlem ka han sawibelh lawk ang a) –

Tuipuibari PHC chungchang hi sawrkar hmasa, (hmasa leh a ni tawh ang chu..) Congress sorkar hun laia sak zawh tawh a ni a, a building te leh staff quarters thenkhatte pawh. Term kal taah khan nasa takin kan bei a, theihna kawng hrang hrang kan zawng a. Khati laia changtu Minister Dr. Thangtea pawhin theihtawp min chhuahpui a. Amaherawhchu, Covid leh thil hrang hrang sum leh pai indaihlohna avang te mai piah lamah, a thawktu tur doctor kan zawng nasa a. Khuti lam chhuak Bru lam te, Chakma lam te pawh khawi atangin emaw ‘an awm chuan...’ tih te leh district chhung hmun hranga mi (MBBS ngei a ngai si a) kan hmu zo ngang lova, ‘khawi khawi atangin emaw a hlawh te pawh kan siamsak mai ang a..’ tih tein. C

Tichuan hei, ZMC atangin doctor thar eng emaw zah kan nei dawn nia a lan tawhah hi chuan, kan sawrkar hian khawngaihtakin hei hi function tir thuai thei sela, ‘tun term chhung’ tih chuan a rei lutuk deuh a, hei hi priority-ah min neihsak se kan ti khawp mai a. Mamit District hi *aspirational* kan nihna chhan pawh health infrastructure leh health facilities kan tlakchham avang te, infant mortality rate a la san avang te leh education lama kan hniam avang tein, heng hi a *parameters* lian tak a ni a; health sectors hi a pawimawh em em a ni. Chuvang chuan, min han ngaihpawimawh zual sak se a thain ka hria a; nakinah demand-ah te pawh kan la sawi tho ang a.

Ka zawhbelhna chu hei hi a ni e - SEDP sawrkar hmasaa atang khan Health Clinic Centre a la awmlohnaah hawn tura ruahman kha a ni a. Ka bial chhung khaw 15 teh meuh, engmah la awm lohna hi a awm a ni. A then chu in 500 chuang te a ni a (**Speaker:** Khawngaihin a zawhnaah khan lut la...) Chutah chuan Health Clinic Centre hi khaw 15-a kan han tihah khan engtin nge kan sawrkar hian kalpui zel a tum? tih leh, khami lo function tur khan a in sak tura ruahman a ni a, a then chu sak tawh a ni a. Kha kha engtin nge, khami kan lo sak tawhna te kha sum leh pai lam hi min reimburse thei ang em? Zawhna pahni ang a ni a - SEDP hnuaia Health Clinic Centre kan han hawn tak kha engtia kalpui chhoh zel tur nge? tih leh, a in saknaa sum kan senso tawh angte kha reimburse theih a ni ang em? tih a ni e.

HON. SPEAKER : A lawmawm e. *Zawhbelhna* - Pu C. Ngunlianbunga.

PU C. NGUNLIANCHUNGA: Pu Speaker, khawngaih takin, ka hming kha ‘C’ ka dah a. Nimin atang tawh khan ‘C’ kha i lam theihnghilh tlat mai a.. (**Speaker:** Sorry, kan lo tihsual palh a ni e.) ‘C. Ngunlianchunga’ ka ni e.

Pu Speaker, ka zawhbelhna chu, (zawhna chu ka siam tho a, a chhuah loh takin, zawhna hi a tight ang reng si a.) Sawrkar hmasaah pawh khan ka zawt deuh reng a, session apiang hian; mahse a hlawhtling thei lova. Tuna ka hmaa Mamit bialtu zawhna ang deuh khan, Congress sawrkar lai khan Longpuighat-ah PHC building sak a ni a, sawrkar hmasa kum 5 term khat chung khan hawn theih lohin a awm quit thak mai a. Nimin lama kan sawi tawh ang khan, *ramhnuai-thlam* a chang lek lek a, kan mamawh em em a ni si a. Longpuighat hnaih ber PHC chu Chawngte, Bungtlang ‘S’ a ni a, Parva area zawng zawng leh Theka dung zawng zawng damlo inphurna atan a hla lutuk a. Longpuighat-ah building awm tawh sa a ni a, khi khi engtikah nge function tir theih a ni ang?

Chumi rual chuan, kan Minister zahawm tak pawhin priority min pek sak hram hram se, ‘kan mamawh hle a ni’ tih kha ka zawhbelhna a ni e.

HON. SPEAKER : A lawmawm e. Zawhbelhna zawt tur dang ka sawm leh hma hian; khawngaihin kan zawhnaah khan cheng ila, a behbawm kha avoid thei hram ila tiin kan han inngen nghal e. *Zawhbelhna* - Pu Lalrinsanga Ralte.

PU LALRINSANGA RALTE: Pu Speaker, ka lawm e.

Kan Health Minister zahawm tak min chhan atan ka zawhbelhna chu - Vairengte CHC hi Mizoram CHC-ah chuan ‘a lun ber ang’ tih tur khawpin (ramri khua a awm a ni bawk a) Vairengte CHC hi a lun khawp mai a. Tunah hian x-ray khawl a hlui chi 50 MA ang kha dah a ni a, a hmantlak tawh mang lova. Sawrkar hmasa pawh khan nasa takin kan sawi thin a, kan zawt a. Amaherawhchu, sum harsatna avangin pek theih loh kha kan ni a. A tawp lama ka hriat dan chuan, Health Department atang hian x-ray khawl 10 vel an chah niin ka hria a. Khata tang khan ‘Vairengte CHC tan pakhat kan earmark ang, a hmun a pawimawh a’ ti khan kan Minister leh official te pawh khan min hrilh a. Kha kha a rawn thleng a nih chuan, x-ray khawl hi Vairengte CHC ah min dah sak thei ang em?

Tin, a pahnihaah chuan - ka bial Serlui Bial-ah hian Health Clinic Centre 11 hawn thar a ni a. A khua a pawimawh hlawm khawp mai a, Saihapui V (ramri issue khulaia kan neihna khaw tereuhte pawimawh tak) te, Thingthelh leh hmun hrang hrangah hian pawimawh tak tak, kilkhawr tak takte a awm a. Chungah chuan SEDP hmangin Health Worker kan ruai a, ban an han ni ta vek mai a. Hei hi a pawimawh si a, min dah khah sak leh thei ang em?

A pathumnaah chuan –Hmar tlangdung hi tun hma atanga anmahni pawh an inngaihndan te, tin, hel lo chhuahna te, ramhnua-mi lo chhuahna te pawh a niin ka hria a. Hmar tlangdung hi kal kan anni nasa hle thin a, development-in a thlawhkhum nasa a, ‘a-zangkhaw bungbut hnan’ tih khawpa kan hmar tlangdungte hi tun hma atanga lo hlamchhiah deuh kan ni thin a. Chuvang chuan, ‘Saipum-ah khuan PHC hi kan mamawh hle’ tiin term hmasa khan NEEPCO hnuaiah CSR kan dil a, building min sak sak a. Chu chu Mizoram sawrkarah kan Health Minister leh official te pawh biain phalna kan hmu a, NOC min pe a, building kan sa a. Chu chu hawn theih maiin a awm tawh a. Hei hi kan Health Minister hian min hawn sak thei se. Tin, doctor pakhat (eng emaw ber) min dah sak theih chuan kan lawm ngawt ang.

Tin, Thingthelh, Hlimen, Saipum leh Mauchar tlangdung leh khulai NEEPCO hnuaia thawk zawng zawngte tan kan chhawr theih tur a ni a. Saipum PHC kan sak tharah hian doctor min dah sak thei ang em?

HON. SPEAKER : Zawhna hi ‘*pahnih*’ kan han ti kha a ni a. Amaherawhchu, kan phar nual a. Tunah Pu Robert Romawia Royte i han sawm leh teh ang.

PU ROBERT ROMAWIA ROYTE: Pu Speaker, ka lawm e.

Ka hmaa mite sawi ang khan, ka bial Hachhek Bial-ah pawh Healthcare leh Health Services chungchangah harsatna kan tawh nasa khawp mai a. Health sub-Centre awm lohna khaw 10-ah Health Clinic Centre sorkar hmasa khan a din a, kan tangkaipui khawp mai a. Thenkhat chu din tlai deuh a nih avang khan *fully* in a la function hman lo nachungin, a function hman tawhte kan tangkaipui hle a. A Scheme min pekna pawh ‘SEDP a ni’ tih kan sawi tawh kha. SEDP hi ‘tih tawp’ tih te, a thenah ‘tih tawploh’ tih te a ni a. Health Clinic Centre atana SEDP provision awma kha tihtawp tak vek em ni? Chuvang chuan em ni Health Clinic Centre-a Health Worker lo thawk tawhte kha an thawh chhunzawm theih tak loh? Pu Speaker, ka lawm e.

HON. SPEAKER : *Zawhbelhna* - Pu Rasik Mohan Chakma.

PU RASIK MOHAN CHAKMA: Pu Speaker, ka lawm e. Hon. Health Minister chhan atan hengte hi ka zawt duh a –

Borapansuri PHC hi PPP mode-a a function-na a rei tawh a. 2019 ah khan District Council-in ‘kan zo lo e’ kan ti a, Mizoram sawrkah - Health Department-ah khan kan ziaak a. ‘PPP Mode ni lovin, state sawrkah min enkawl sak rawh se’ kan ti a. July thla velah khan ‘Mizoram sorkah a take up ang’ tiin sawrkah order a awm tawh a ni. Kum 2019 khan staff recruitment tur pawh (official-te min hrilh dan chuan) hma lak mek a ni a. Mahse tithei hi an awm ta lova, tun thlengin. District Council tan chuan source kan

nei si lova, fix pay-in hlawh kan pe ngar ngar a, hospital maintain nan chuan a hautak si a, kan zo lo a ni. Sawrkar order a awm sa tawh bawk a, kha kha a rang thei ang berin sawrkarin min lak sak sela, PPP Mode ni lovin Mizoram Sawrkar - State Health Department-in min enkawl sak thei tawh ang em? Engtik atangin nge a enkawl tan theih ang? tih hi ka zawhna a ni e.

Tin, Member zahawm tak, Pu C. Ngunlianchunga khan Longpuigath khuua Health Centre function tir chungchang a sawi a, kha pawh kha a rei tawh a, building te, hmanni lawkah pawh khan quarter te pawh an sa a. Chuvangin, a rang lama kan maintain emaw, kan hawng emaw a nih loh chuan sawrkar sum bakah building leh quarter tha tak sak tawh kha a uiawm lutuk a. Kan sawrkar hian *top-priority* a pe thei ang em?

Tin, ka zawhna dang leh chu - Chawngte area hi a zau ve a, a khawchhung ringawt pawh tunah population Chawngte 'L' leh 'P' te nen chuan 22,000 chuang a ni. A coverage area hi - Lungrang te, Rualalung te, Diltlang lamte a ni vek a ni. Chuvangin sub-Divisional Hospital-a hlankai theih dan a awm em? tih hi ka zawhna a ni.

HON. SPEAKER : A lawmawm e. *Zawhbelhna* - Pu R. Rohmingliana.

PU R. ROHMINGLIANA: Pu Speaker, ka lawm e.

Ka *Zawhbelhna* chu - Ka bial Thorang Bial-ah hian PHC pahnih kan nei ve a, doctor hi a full-in an awm ngai reng reng lova. Tin, doctor mai bakah x-ray technician kan nei ngai lo bawk a. Tunah hian doctor leh x-ray technician hi Thorang Bial chhung PHC pahnih - Bungmun leh Lungsen-ah hian min dah sak ve thei ang em?

Ka zawhna chhan bulpui ber pakhat chu - Thorang Bial hi kawng a chhe em em mai a, damlo inphurh a har si a. Keini remote area, Thorang Biala PHC pahnih tal saw chu min ngaihtuah sak bik deuh a ngai a ni.

SPEAKER : *Health* - hriselna lam kaihnhawih a nih vang nge ni, kan la zel hrih phawt mai a ni ang chu; a pawimawh a ni ang e. Tunah, *Zawhbelhna* - Pu H. Ginzalala ilo sawm ang.

PU H. GINZALALA : Pu Speaker, hun min pek avangin ka lawm e. Health Minister min chhan atan *Zawhbelhna* pahnih ka nei a.

Pakhatnaah chuan - Champhai ICU hi tunah hian shut-down a ni a, hei hi a hawn dan a awm leh thei ang em?

Pahnihna chu - ka zawh hmain tlem han sawi zau deuh ngaiin ka hria a. ZMC saw kan hriat angin Mizoram sawrkar enkawl atan chuan a hautak em em a, kan hotute lu pawh a hai a ni. Amaherawhchu, central lamah khuan zuk ngaihven ni sela, 'central

sawrkarah te pawh hlan dan a awm mai lawm ni' tih hi kan hotuten ngaihlan an nei niin ka hria a. Tichuan, central lam an zuk dawr khan mak tak main, (Pathian thiltih te pawh a ni ang chu) Central Minister khan *special package* kha arawn remti ta a, a lawmawm khawp mai a.

Ka han sawi zau lawk ang a. ZMC hi central sawrkar kuta kan dah chuan kan chan nasa dawn khawpin ka hria a. Tunah hian Mizoram state quota hi kumtin 70 vel kan nei a. Amaherawhchu, central sector-a kan dah a nih erawh chuan, khati zat kha kan nei dawn miah lo tihna a ni. All India competition te a awm ang a, chutah chuan 7.5% ST reservation te kan hauh thei turah ngai ila. Amaherawhchu, vanneihthlak deuh maiin kan hotute kaltlang khan Pathian malsawmna kan dawng a, khatianga tih ngai lo khan *special package* min lo pe thei dawn ta a ni a, a lawmawm ka ti khawp mai a. Kan hotute hmalakna a chhuanawm ka ti a, lawmthu te pawh kan sawi duh a.

Tunah hian central sector atana buatsaih mek niin ka hria a. Pu Speaker, ka zawh duh chu - Engtikah nge he special package hi kan hmuh theih ang; tunah engnge kan thlen chin? Hetiang anih tak ro ro ah chuan, ZMC hi changtlung taka tih ni sela ka duh a, hei State dang - Bengaluru te, Delhi te, Mumbai-ah te kumtin mai hian kan zuk inentir a, medical treatment ah sum tam tak (sawrkar ang leh private ang pawhin) kan seng thin a ni. (**Speaker:** Khawngaihin, a zawhnaah khan luh ni se la..) Pu Speaker, ka han sawi zau deuh ang, engpawhnisela.

Khatianga saving awm thei tur khan kan sawrkar hian hma a la thei tur hi a lawmawm ka ti a. Chuvangin, ZMC hi Pathian malsawmna kan dawnna niin ka hria a, kan hotute kut hi a tihmuiin ka hria. He sawrkar hi *Pathian-malsawm rimnam* a nihna pawh a lo langin ka hria a. He ZMC hi tihchangtlun ni sela, India ram pum huap pawhin nasa taka tihchangtluna, 'belh tham, pan tham law law turin buatsaih ni sela' tiin ka duh thu ka han sawi ni sela.

Ka *Zawhbelhna* chu - Tunah hian *special package* hi eng nge a thlen chin? Ka lawm e.

HON. SPEAKER : *Zawhbelhna* - Pu Jeje Lalpekhlua i lo sawm ang.

PU JEJE LALPEKHLUA: Pu Speaker, ka lawm e. Hon. Health Minister chhan atan ka zawh belh duh chu – “PHC ah hian doctor awmlohna hi engzat nge awm?” tih a ni e.

HON. SPEAKER : A lawmawm hle mai; a zawt thiam e. Khatianga khan zawhna kan neih pawhin zawt thiam ila a lawmawm khawp ang. *Zawhbelhna* - Member zahawmtak Pu K. Hrahmo i lo sawm ang.

PU K. HRAHMO : Pu Speaker, ka lawm e. Ka *Supplementary Question* chu hei hi a ni e -

Sawrkhar hmasa khan PHC thenkhat CHC ah upgrade anni a, sawrkhar thar hian hei hi a pawm em? Pawm ni se, PHC angin nge a function dawn CHC angin? CHC angin a function tir thei ang em?

A pahnihna - Khaw thenkhatah sub-Centre pek an ni tawh a, building pawh tha tak takte an nei hlawm a, a thawktu Health Worker erawh a neilo khua an tam a. Sawrkhar hian heng khuaah te hian Health Worker min dah sak thei ang em? Ka lawm e.

HON. SPEAKER : A lawmawm e.

PU LALDUHOMA, HON. CHIEF MINISTER: Pu Speaker, nimin lawkah khan *ruling* i siam a; ‘Supplementary a zawttuin question pakhatat nei sela, midang pahnih nen *pathum* ni sela’ tih kha a ni a. A tul viau chuan pahnih-khat te chu i phalsak thei bawh a. Hei, question pakhatat khati zat khan supplementary an zawt ta a. Heti anih chuan, a chhanna nen darkar chanve aia tam kan hmang dawn tihna a ni ta a. I ruling kha ken kawh ava tha em ve aw? A dawt leha awm tan khan chance a awm dawn lo tlat, heti chuan.

HON. SPEAKER : Aw le, a dik khawp mai. Kha kha member ten kan hriat tlan anih rualin, kan han duhthawh deuh thin kha a ni a. Helai atang chuan ‘kan zavaiin sawi ila’ tih kan duh a, amaherawhchu, question dang tam tak tak a awm a. Hei vawiiinah question 20 lak a ni a, question dangte pawh pawimawh tak tak vek tho anih avangin. Tin, kan bial te teah khan harsatna chu a awm theuh a ni; kei pawh hian sawi dawn ila, sawi tur ka nei teuh maithei a; kha kha chu dah tha rih ta ila. Zau zawkin kan Health Minister khan ngaihtuahna a lo hman theih nan; tin, question a tam lutuk khan a tan a buaithlak ve thei e.

Awl le, tunah chhang turin kan Health Minister zahawm tak Pi Lalrinpuii, a theih ang angte, zawhnate a inkarkiin a inhlat khawp mai a, a theih chin chin chhang turin i lo sawm ang u.

PI LALRINPUII, HON. MINISTER: Pu Speaker ka lawm e. He House zahawm taka Member Pu H. Lalzirliana *Zawhbelhna* chhanna –

Pakhatna – “ZMC doctor thar lo awm turte hmang hian function tir dan a awm ang em?” a tih kha, ZMC zirilaite hi Pathian zarah April thla tawp hian an zir zo mai dawn a, chumi hunah chuan a awm thei ang.

Pahnihna – SEDP Health Clinic Center khaw 15 a bial chhunga a din tawh kha, an sak tawhna man kha pek tum a ni. “Engtinng kalpui zel a nih ang?” tih kha – tunah hian kan official staff ten an enfel mek a. A nihna takah chuan health clinic hi ministry recognized a ni lova, dan lo anga din anih avangin, hmun 235 ah sawrkar hmasa ah khan lo hawn a ni a, chutah chuan SEDP hmangin Health Worker te, helper te, IV Grade te chhawr anni. Khang zawng zawng kha Pu Speaker, tunah chuan SEDP kha November, 2023 (kan sawrkar hma) khan sanction a lo tawp tak avangin, chhawr chhunzawm anni lova. Amaherawhchu, chuti chung chung pawhin Health Clinic Center hmun hrang hranga sawrkarin a lo dahnate chu a tul dan anga la chhunzawm zel tum a ni.

Member zahawm tak Pu C. Ngunlianchnunga *Zawhbelna* pakhatna – Longpuighat PHC function chungchang hi, hei pawh hi sawrkarin a ngaipawimawh em em a, tunah mai pawh hian kan staff pakhat chu a awm mek a, a thlalak te nimirah a rawn thawn a, building tha tak mai a lo ni a, a rang thei ang bera function tirnkan chak em em a.

Kan sawi tawh hnu baw, tunah hian (Pu Jeje Lalpekhlua zawhna kha ka chhang nghal ni ta sela) ‘MO’ kan tih, PHC ah hian doctor awm miah lohna hmun 15 a awm a chung zingah chuan Longpuighat pawh hi a tel a. Doctor kan neih ve leh function tir tum a ni.

Tin, Pu Lalrinsanga Ralte *Zawhbelna* pakhatna – “Vairengte CHC-a 50 MA x-ray khawl hi min thlak sak thei ang em?” tih hi, MHSSP fund atanga lei tum mek a ni. Tin, “SEDP - Health Worker ban takte chhawr chhunzawm dan a awm em?” tih kha, SEDP a awm tawh loh avangin, chhawr chhunzawm tum a ni lo. A pathumna - “Saipum-ah PHC hawn a ni thei ang em?” tih hi, a norms te (khawngaih takin Pu Speaker, a zawhna ka lo hre fuh lo deuh a..) Pu Rinte, hei hi ‘sak vek tawh a ni’ i ti tiraw? (**Pu Larinsanga Ralte:** Pu Speaker, i phalna in kan sawi nawn lawk ang a. Saipum khu remote area a ni a, Hmar tlangdung khaw lian leh pawimawh tak a ni a. Tin, a area cover tur a zau a. Chutah chuan, NEEPCO hnuaia CSR atangin PHC sakna kan dil a, kan hmu a term hmasa khan. Tunah hian sak-puitlin tawh a ni a, hawn theih maiin a awm a. Khu khu (*special case* deuh tak pawhin) “PHC-a min tih sak theih dan a awm em? A awm kher loh pawhin, doctor pakhat daha, tuna *Health & Wellness Center* a kan hman upgrade nan khuan min tihsak thei ang em?” tih kha ka zawhna a ni.)

Pu Speaker ka chhanna chu – “Saipum PHC ah hian thawktu tur kan neih hunah *Health & Wellness Center* awm sa upgrade nan hman kan tum ang” tih hi ka chhanna a ni.

Tichuan, Pu Robert Romawia, Member zahawm tak zawhna – sub-Centre awm lohna hmun 10 ah Health Clinic din chungchang kha, Pu Speaker, ka sawi tawh ang khan, dan lo anga Health Clinic te lo din thluah a nih avang khan, a harsa em em mai a, HR kan pe thei lova. Tin, SEDP kha a awm tawh loh avangin kha laiah khan harsatna kan tawh ta a ni.

Pu RM Chakma, he Member zahawm tak zawhna, a chhannate chu – Pakhatna - Borapansuri PHC PPP mode, 2019 CADC ten ‘kan zo lo’ tiin State sawrkarah an rawn thlena kha, sawrkar dan awm tawh a nih avangin, ‘tunah hian a function theih dan ang ang awm turin ngaituah mek a ni.

Pahnhna - “Chawngte CHC Sub-Division-a hlankai dan a awm em?” tih kha – Nichin a ka sawi tawh ang khan, Pu Speaker, IPHS norms ah hian tlang ramah chuan ngaihnathiamna in PHC hawng tur hian mi 20,000 talin an chhawr tangkai turin phal a ni a, tlang ram ni lo phai ramah phei chuan mi 50,000 talin an chhawr tangkai tur a ni. CHC te pawh hi mi 80,000 talin an chhawr tur a ni a, dan lo ang vek hian thil hi tam tak kan lo kalpui tawh a, CHC pakua kan neih tawh sa bakah, nikum inthlan dawn hnaih te khan Pu Speaker, CHC ah PHC pasarih chu hlankai leh alo ni ta a. Hei hian sawrkar lu pawh a tihai em em a, staff kan nei lo a.

Kan hriat angin tunah hian Doctors Association ten min hriattir ang hian, doctor hnaruak hnawh khah loh hi post 101 a awm a, nurse hi 143 post ruak hnawh khah loh a awm bawk a, Health Worker hi 412 a awm a. Chutiang zel chuan pharmacist te, lab-technician te, x-ray technician te a tam em em a. Kan State sum harsatna vangin hmun tinah hian Health Clinic te, PHC te leh CHC te heng zawng zawng hi anih tur anga han function tir te pawh kan chak em em rualin, State ah sum indaih lohna vangin, tunah hian function thei lo tam tak a awm a. kan Finance Minister Pu Lalduhoma hnenah pawh vawi duailo ka sawi tawh a, ‘post ruak hnawh khah rawn dil rawh u’ a ti a, tunah pawh hian nurse chu kan dil mek a, a dang hi kan en fel chho mek a; tun session lai pawh hian kan official ten an buaipui mek a.

Tichuan, Pu RM Chakma zawhna ka chhanna chu – “tun dinhmunah sawi theih mai a ni lo” tih a ni.

PU ROBERT ROMAWIA ROYTE: Pu Speaker, *Points of clarification*, please. A pawimawh em mai, min phalsak chuan.

SEDP a tawp avangin Health Worker te rawih chhunzawm theih loh niin kan Minister zahawm tak khan a sawi a. ‘SEDP hi a tawp chiah em?’ tih lai hi a ngaituah thamin ka hria a. Kan duhsakte chuan SEDP hi an department ah an la chhunzawm zel a ni lawm ni? Zirtirtute pawh Minister smart tak Pu Mathlantea hi a nih vang te pawh a ni mai thei a, zirtirtute pawh hi SEDP atanga hlawn la turin 31st March thleng an la ruai dawn niin a lang a. Tin, department tam takah SEDP hnathawh laite pawh a kal zel a. Nge ni, ZPM hian kan hmeichhe chhuanawm tak Minister hi kan ti duhdah deuh em ni? “Engatinge Health Sector ah hian SEDP chu kan lo tih tawp bik?” tih lai kha a rawn sawifiah theih chuan avan lawmawm dawn em?

HON. SPEAKER : Kha kha chu Health Department concern a ni lova, Finance lam te pawh a ni mah mah maithei a; Minister-in tun mai ah a chhang theilo a nih pawhin....

PI LALRINPUII, HON. MINISTER: Pu Speaker, ka chhang thei tho mai. November, 2023 khan Health Department ah chuan SEDP atanga rawih Health Worker leh Staff Nurse zawng zawngte kha a tawp tawh avangin; “kan sawrkar hma khan a tawp tawh a ni” tih kha ka chhanna a ni.

Tichuan Pu Speaker, ka chhan chhunzawm zel ang a. Pu R. Rohmingliana he House zahawm tak Member zawhna – “Thorang ah PHC 2 an awm a, doctor min dahsak thei ang em?” tih kha, ZMC atanga doctor-te an graduate ve leh kan dah dawn a ni.

Pu Speaker, he House zahawmtak Member Pu Ginzalala zawhna – “Champhai Hospital ICU hawn dan a awm em?” tih kha, Pu Speaker, hei pawh hi thawktu indaih loh vang vek a ni a. Champhai chauh ni lo, keima chenna Lunglei khuaah te pawh ICU kan run thei lova, NHM atangin nurse te tlemte an han dah thin a, ICU duty tur chuan inthlak kual te a lo ngai a, a hautak em em a. Chuvang chuan, hei pawh hi thawktu an indaih ve leh run leh tur a ni.

Tin, a zawhna pahnihna – “ZMC hi central lamin special package min pek tak kha engtikah nge kan hmuh ang?” tih kha, Pu Speaker, a lawmawm hle mai. Kan hriat ang khan ZMC chu central sawrkarin “special package kan lo pe ang che u, proposal rawn siam rawh u”, an ti a, kan proposal te kan zuk tlan thlakpui leh a, tin, kan Chief Minister-in a zuk sawi bawk a. Chutiang chuan, an la ngaipawimawh em em a, kan mamawh hmasa ber *thawktu-indaihlohna* chungchangah, “HR ah DPR rawn siam ula, a first-phase hi kan pe ang che u” an ti a. Tunah hian DPR kan peih tep tawh a, peih a nih hunah chuan official lamin an kalpui ang a; hetah hian ₹1.9 crore vel DPR kan siam a ni.

He House zahawm taka Member zahawm tak Pu K. Hrahmo zawhbelhna – “Sawrkar hmasa khan CHC te PHC ah upgrade a awm nual a, PHC anga function tir tumna a awm em?” tih kha chu Pu Speaker, nichina ka chhanna tho kha a ni a. Thawktu indaih lohna nasa vangin a harsa em em a, doctor leh nurse-te kan indaih lo a. Mizoram Healthcare hi ka han luhchilh tak tak a, ka han zirchian chuan, kan Pu ber, kan CM hnenah pawh hian, “kan collapse lo chauh niin ka hria, ka hmuh chhuah dan chuan” tiin report pawh ka pe tawh a. Hei hi thawktute kan indaih hunah chuan sawrkar hmasain CHC-a a lo hlankai tawh zawng zawngte pawh hi a nihna ang taka function tir tum a ni.

A zawhna pahnihna – “Health sub-Centre Health-worker nei lote hnenah sawrkar in Health-worker pek tumna a nei em?” tih chhanna chu – Awm e; thawktu kan indaih hunah kan pe ang. Pu Speaker, ka lawm e.

HON. SPEAKER : A lawmawm e.

Health Department changtu Minister kha, hei, zawhna kan siam hian a karkik thei khawp mai a, amaherawhchu kha felfai takin a rawn chhang a, a lawmawm hle a ni.

Tin, kan House Leader-in a rawn *raise* a kha, kan sawi tawh angin, zawhbelhna hi ‘pahnih kan la ang e’ tiin nimin lam khan kan sawi a, kha kha zawm hram hram kan tum dawn nia.

Tunah chuan, zawhna dangah kan kal ang a, hei pawh hi health lampang tho a ni a. Khatiang khan a dangah pawh a la awm leh zel dawn tho a, health lam kha. Chuvangin member-te zawhna tam zawk kan address theihna turin leh, ram puma kan rawngbawlinaah rawngbawlina zau zawk kan neih theihna turin hun te kha ren deuh thei ila. Tin, zawhna kan zawh khan, a *zawhna*-ah khan cheng mai ila, ‘a zawhna kha zawt mai ila, kual thui duah lovin’ tiin kan han inngen e.

Starred Question No. 22 – Zawt turin Saiha Bialtu Dr. K Beichhua, Member zahawm tak ilo sawm ang.

Starred Question No. 22 - Health & Wellness Centre chungchang.

DR. K. BEICHHUA : Pu Speaker, ka lawm e. Health & Family Welfare changtu Minister zahawm tak hnena ka zawhna *Starred Question No. 22* chu -

“Mizoram-ah Health & Wellness Centre engzat nge kan neih? A thawktu dah khah vek anni em?” tih a ni e.

HON. SPEAKER : Chhang turin a changtu Minister Pi Lalrinpuii kan sawm e.

PI LALRINPUII, HON. MINISTER: Pu Speaker, *Starred Question No. 22*, he House zahawm taka Member Dr. K. Beichhua zawhna ka chhanna chu —

Tun dinhmunah hian Mizoram-ah Health & Wellness Centre (HWC) 391 kan nei a, chungte chu —

1. Primary Health Centre (HWC) – 54;
2. Sub-Centre (HWC) – 319;
Urban PHC (HWC) – 9.

“A thawktu dah khah vek a ni em?” tih chhanna chu – Health & Wellness Centre (HWC) ah hian thawktu awm tur ang dah khah vek a la ni lo” tih a ni. Ka lawm e.

HON. SPEAKER : A lawmawm e. Zawhna neitu khan zawhbelhna a nei em?

DR. K. BEICHHUA : Pu Speaker, ka *Zawhbelhna* chu –

i) Mizoram-ah hian medical doctor kan indaih lo viau mai a, MPSC kaltlanga lak belh tumna a awm em?

ii) CTScan hi khawi hospital-ah te nge kan neih? Operational an ni vek em?

iii) Tun dinhmunah hian Mizoram-ah IMR engzatnge a nih?

Siaha District IMR hi 27 lai a ni a, hei hi tihniam tura hmalakna a awm em? Engtia hmalak tum nge?

iv) Siaha Nursing School building Congress hunlaia sak zawh loh, vawiin ni thlenga zawh loha la awm reng hi, he sawrkar hian siamthat tumna a nei em? Zawh tumna a nei em? Ka sawi kual vak lo ang a; i thu ka awih ang a, Pu Speaker.

v) District Hospital Siaha ah hian Surgeon kan nei a, ENT Surgeon kan nei bawk a, Gynaecologist kan nei bawk a, Ophthalmologist kan nei bawk a. Chutih lai chuan Anaesthetist kan nei tlat lo mai a; silai tha tak neia a mu nei lo ang kan ni a. Chuvang chuan, Anaesthetist hi min dahsak thei ang em? tithe kha ka zawhbelhna a ni e.

HON. SPEAKER : A lawmawm e. *Zawhbelhna* - Pu VL Zaithanzama ilo sawm ang.

PU VL. ZAITHANZAMA: Pu Speaker, ka lawm e.

Kan Health Minister zahawmtakin zawhna tam tak a chhan kha ka lo ngaithla a, kan Health Minister hmasate tih theihloh tam tak thla hnih chhung leka a hmalakna zauzia kha kan sawi tel hram duh a ni.

Ka *Zawhbelhna* chu - Tunah MRI hi sawrkar enkawl damdawiin zingah hian ZMC ah chauh a awm niin ka lo hria a. Mipuite'n kan pan nasat ber - Civil Hospital ah hian dah tumna a awm em?

HON. SPEAKER : A lawmawm e. *Zawhbelhna* - Pu Lalchhandama Ralte.

PU LALCHHANDAMA RALTE, OPP. LEADER: Pu Speaker, ka lawm e.

Ka *Zawhbelhna* chu, (nichin lawka kan Health Minister-in a rawn sawi) - SEDP Health Worker kan chhawrte sawrkar hmasain November thla tawp thleng hlawh a siama a titawp anga a sawi kha, tihtawpna order sawrkar hmasa khan a lo siam reng em? A awm chuan, House min pe thei em? Chumiah chuan, hlawh-bi hi quarterly-a siam a ni a, November thla thlenga siam bakah khan, “sawrkar tharin an hlawh tur kha a siam ve loh avanga tawp zawk?” tih kha ka zawhna pakhatna a ni a.

Pahnihnaah chuan - Ka zawhna vawiina lo chhuak tura ka ngaih a chhuah hman hmel tak loh vangin ka han phar hma pawh a ni a. Nichinah khan kan Health Minister khan a rawn chhang tel tawh tho a, Darlawn CHC thar kan neih tihpuitlin tumin hma an lak tur thu a sawi te kha lawmawm ka ti a. Chutih rual chuan, ka bial chhungah chuan Darlawn hi kan khaw lian ber a ni a, doctor (MBBS) hi hun eng emaw chen kan nei ta lova, kan neih lai mekin zirna sang zawk a zir a vangin. Hei hi a rang thei ang berin doctor (MBBS) hi Darlawn -ah min pek sak thei ang em?

Pu Speaker, helai hi kan Health Minister khan a sawisual palh a awm em aw; clarify tula hriat ka nei a, chu chu - ZMC tana *special package* central-in siam tura a rawn tiha DPR an thehluh kha ₹1.9 crore a ni a, ‘₹190 lakh special package’ tih kha chu a sawi sual palh em? ‘A tlem lutuk ang em aw’ ka ti a. Chute chu eng emaw House record-ah hian a awm dawn a, tihsual palh a nih takin, kha kha a rawn sawifiah thei a nih chuan; Zoram pumin special package min pek tur kan lawm em em lai khan. Khalai te kha “a tlem mah mah em le?” ka ti a ni.

HON. SPEAKER : A lawmawm e. A chhang turin Pi Lalrinpuui, Minister i lo sawm ang.

PI LALRINPUUI, HON. MINISTER: Pu Speaker, ka lawm e. He House-a Member zahawmtak Dr. K. Beichhua a *Zawhbelhna* chhanna –

“MPSC kaltlanga Doctor lak belh tumna a awm em?” tih kha - doctor Specialist 7 leh M.O. 9 lak tum a ni a. Specialist chu tunah hian recruitment a kal mek a, M.O. pawh hi an recruit theih thuai beisei a ni.

“CT Scan khawi Hospital ah nge a awm?” tih kha - Aizawl Civil Hospital te, Referral Hospital Falkawn (tuna ZMC Medical College a kan hman tak) te, Lunglei te, (pakhat leh kha Pu Speaker, min lo hrethiam lawk la, helai ah hian ziakin ka chhinchhiah thlap a ... (**Speaker:** Tuna chhan a harsa deuh a nih chuan, nakinah member hnenah ziakin a pek theih tho e.) Ni e, nakinah khan kan inhrilh leh mai ang a, hmun pakhat kha ka han theihnghilh zauh a ni.

Tichuan, chungho chu ‘a operational vek’ a tih theih a. Lunglei saw a battery 32 zinga 2 te kha a lo chhe hlauh mai a, a la hman theih tho a; amaherawhchu, dim deuh hleka hman a ngai thung a. Tichuan, Pu Speaker, hei, ka lo nei leh ta chiah a. Mizoram State Cancer Institute, Zemabawk; chu nen chuan 4 (pali) kan nei a ni. Tunah chuan ‘operational vek’ ti pawhin kan sawi thei ang chu.

Tin, Lunglei bikah hian, Labour Annual Maintenance Contract hi supplier-te nen kan signed fel tawh a, payment process peih fel anih ve leh maintenance pawh ti nghal turin kan ti a ni.

Pu Speaker, i phalnain Dr. K. Beichhua zawhna - “IMR engzat nge kan neih?” tih kha, hei hi chu ka hriat chiah loh avangin nakinah hrilh ka lo tum dawn nia.

Tichuan, “Siaha Nursing School building sak zawh tumna a awm em?” tih chhanna chu – ‘Awm e’ tih a ni. Tin, Siaha Hospital-a Anaesthetist awm lo hi keini pawhin a paw kan ti em em a. Siaha hi kan hriat theuh angin refugee te an dawl tam a, foot-fall te a sang em em a, hospital ah, kan ngaipawimawh takzet zet a. Tin, kan MLA pawh hian a ngai pawimawh em em a, a sawi te pawh a sawi thin a. Hei hi nichina ka sawi tawh ang khan, doctor lak turte hi an vang em em a, a then an zir leh nen. Chuvang chuan, ‘a theih ve leh dah a ni ang’ tiin ka han chhang a ni.

Tin, Member zahawm Pu VL Zaithanzama zawhna – “MRI, ZMC ah chauh a awm a, Aizawl Civil Hospital ah hian dah tum a ni ve em?” tih kha - Smart City project kaltlangin MRI, Civil Hospital ah kan nei ve dawn a ni. Ka lawm e, Pu Speaker.

Ngawi rawh aw, Pu Speaker. IMR chungchang kha hei, kan ha han hre leh nghal a, helaiah hian kan official ten min rawn hriattir leh nghal a. Mizoram IMR chu ‘3/1000 life-birth a ni’ tih kha ka chhanna a ni e. (Dr. K. Beichhua: Pu Speaker, Siaha bik kha 1000 zelah 27 thi kan ni a, chulaiah chuan “hmalakna a awm em? Engtia tihhniam tumna nge sorkarin a neih?” tih kha ka zawhna a ni a, min chhan theih chuan) Pu Speaker, NHM lamah hianin tan an la em em a; hei, a changtu Dr. Lily te pawh hi a zin kual nasa em em a, theihtawpin helaiah hian hma kan la a. “tih hniam hi kan tum a ni” tih kha ka chhanna a ni.

Tichuan, Leader of Opposition Pu Lalchhandama Ralte min zawhna – “SEDP Health Worker tihtawpna order min pe thei em?” tih hi - Official lam atangin neih ka lo tum ang a, kan inpe dawn nia. Tin, special package ₹1.9 crore kha chu, a first - phase atan a ni tih kan sawifiah baw e. Ka lo sawipawlh deuh a ni mai thei. Pu Speaker, ka lawm e.

HON. SPEAKER : A lawmawm e. Zawhna kha a karkik khawp a. Rmpum a ni a, khaw bil te te leh bial bil te te kha. Chanchin kan han hre duh baw si a, a khirh ve viau baw a ni A achangtu Minister tan khan. Engpawh nise, a lawmawm e.

Tichuan, *Starred Question No. 23* - Zawt turin Tuirial Bialtu Member zahawm takPu K. Laldawngliana i lo sawm ang.

Starred Question No. 23 - Health Care chungchang.

PU K. LALDAWNGLIANA: Pu Speaker, ka lawm e. Health & Family Welfare Department changtu kan Minister zahawm tak chhan atan ka zawhna, *Starred Question No. 23* chu –

“SEDP sum cheng vaibelchhe 150 atangin healthcare bill tur vaibelchhe 40 dah hran kha semchhuah a ni tawh em?” tih a ni.

HON. SPEAKER : Chhang turin Minister chngtu i lo sawm ang.

PI LALRINPUII, HON. MINISTER: Pu Speaker, ka lawm e. He House zahawm taka ka Member-pui Pu K. Laldawngliana, MLA zawhna kha, ka chhanna chu -

SEDP sum cheng vaibelchhe 150 atanga Healthcare Bill tur vaibelchhe 40 dah hran kha semchhuah a la ni lova, amaherawh chu Healthcare Bill ba 15 crore kha, sawrkarna kan han chan chiah khan kan ngaihpawimawh em avangin, kan Chief Minister, kan Finance Minister ni bawkin a rawn release a, chung chu pekchhuah a ni tawh a. SEDP bik atanga 40 crore kha chu kan Finance Minister hian a sawifiah thiam zawkin ka ring a, Pu Speaker rem i tih chuan, amah hian min sawifiah sak ta mai se. Ka lawm e.

HON. SPEAKER : A lawmawm e. Zawhna neitu khan *Zawbelhna* a nei em?

PU K. LALDAWNGLIANA: *Zawhbelhna* - Healthcare Bill ba kha tun dinhmunah engzah nge la awm? Tin, mipuiten kan nghahhlelh ber a nih avang hian ba rulh zel dan tur hi engtia hmalak tum nge?

Tin, Kan Health Minister zahawmtak chungah pawh lawmthu kan sawi tel duhna chhan chu, chhanna atang khan keini bialah pawh Kawnpui PHC chu CHC ah hlankai a ni a, ‘sum awm ve leh function tir a ni ang’ tih kha, ka zawhna tur a ni a. Amaherawh chu a chhan tawh avangin lawmthu kan sawi duh a.

Ka *Zawhbelhna* pakhat leh chu - Lungdai hmun khu (sawrkar hmasaah pawh kan sawi tawh a) x-ray khawl kan nei reng reng lova, accident tamna hmun a bul vel a nih avangin, x-ray khawl hi a lo thlen ve leh (hei hi chu sawrkar hmasaah pawh kan sawi tawh a) min lo ngaihpawimawh sak theih chuan kan lawm ngawt ang a. Min chhan theih chuan ka lawm ngawt ang.

HON. SPEAKER : A lawmawm e. *Zawhbelhna* - Member zahawm tak Pu Ramthanmawia.

PU RAMTHANMAWIA : Pu Speaker, ka lawm e. *Zawhbelhna* kha, PHC kan sawi a, ka phar a; ka chang ta lova.

Hei, ka bialah hian damdawiin (ti mai ila) PHC pali kan nei a, tunah hian doctor neih lohna pahnih - Farkawn leh Sesih a ni a. Farkawn ami chu zirna sang zawk avangin a kal bo a. Sesih hi history nei ve a ni a, kum 34 zet PHC, khatih laia kan Health Minister

zahawm tak Pu Vaivenga'n a hawn, khata tanga doctor hmel hmu ta lo vang vang, kum 30 chuang fe hnu, 2020 ah khan sawrkar hmasain harsa takin doctor tha tak min pe a, kan lawm em em a, kan hmang tangkai a, khilaia ramri a awm a ni baw k a kan tangkai pui a. Tun sawrkar kan han inthlak chiah a, Tuipang-ah min sawn sak dawrh mai lai hi, Pu Speaker, kan House Leader-ina "Opposition bial pawh ka enhrang lo ang che u" a tih kan lo thlamuanpui em em laia, khilai kilkhawra mi chhim tawpah min sawnsak lai hi rilruah chuan, kan sawrkar thar, 'mipui-sorkar; hleih neilo-sorkar' tia keini pawhin kan lo beisei em em lai hi ngaih chu a ti thalo deuh a ni, Pu Speaker. Chuvang chuan, hetiang hi kan kalphung turah ni tawh lo sela.

Kan Minister zahawm tak pawh kan ngen tawh a, a chanchin te kan zia k a, a aiawh tur minrawn pek te pawh 'an awm duh lova, banna an thehlut' tih te kan hre leh zel a. Tunah hian doctor nei lovin kan awm a, engtikah nge doctor a thlakna tur min pek leh thuai theih ang? Kan tangkaipui em em a, tunah hian thlabarin kan awm a ni; "Opposition bialte hi thlabar, thlaphangin min dah dawn nge, he sawrkarah hian ngaihtha takin min dah dawn" tih hi vawinah hian ka sawi duh a ni. Hetianga thil lo kal ta hi kan House Leader ngaihda n a nih pawh ka ring lova. Pu Speaker, ka lawm e.

HON. SPEAKER : *Zawhbelhna* - Pu TBC Lalvenchhunga.

PU TBC LALVENCHHUNGA: Pu Speaker ka lawm e.

Health Minister min chhana tan, *Zawhbelhna* ka neih pakhat chu - Ka bial chhung Sairang PHC ah hun rei tak atangin doctor kan nei tawh lova, Official te ah leh Minister hnenah zia k tein kan thlen a, mahse kan indaihlohna te kan han ngaithla a; khalam ai mahin tunah chuan kan bial chhunga Sairang PHC ah khuan a hnathawktu tur X-Ray technician kan nei a, a x-ray khawl pawh kan nei a; amaherawh chu, a building kan nei lova, khu khu "engti angin nge hma min laksak theih ang?" tih kha ka zawhna pakhatna ni sela.

Ka zawhna pahnihna atan chuan - Doctor indaihlohna a bikin Health Workers te pawh a niang, kan ngaithla a. Khatah khan kan medical officers sawrkarin kan lak zingah 'administrative post' ti mai ila, (kan hriatthiam thei dan tur zawngin) office a thu, "doctor hna thawk ni lo engzat nge kan neih?" tih kha ka rawn zawh belh a ni e. Ka lawm e.

HON. SPEAKER : A inpersan ang reng khawp mai a, a then Tlabung, a then Siaha, a then East Tuipui lam leh Sairangte a ni nuai mai a. Kan Minister-in a zawng zawng a rawn chhang thei lo a nih pawhin mawh lo ila; a theih ang chin chin chhang turin lo sawm ila. T

Tin, a hnu pawh hian health-related question a la awm nual zel tho a, chu vangin member a zawttute khan zawhbelhna kha chu la tam chiam lo mai ila, kan inhrethiam dawn nia.

Awle, a theih ang ang chhang turin Minister changtu, Pi Lalrinpuii i lo sawm ang.

PI LALRINPUII, HON. MINISTER: Pu Speaker, ka lawm e. Hun a tawp tep tawh a, Pu Speaker, ka chhunzawm zel dawn em ni ang? Heti hi chuan ka chhang zo hman dawn lovin ka hre deuh a..

HON. SPEAKER : Eng nge House kan ngaihda le? (House-in chhan zawh tir a remti a...)

PI LALRINPUII, HON. MINISTER: A nih leh aw. Pu Speaker Pu K. Laldawngliana, he House Member-in min zawhna – “Healthcare Bill ba engzat nge awm?” tih kha, tun, a hnuhnung berah hian ₹45,59,61,743/- crore a ni a. Hetah hnian SEDP atanga kan pekchhuah tur 40 crore kha kan paih chuan, a bang hi 5.6 lakh vel a ni dawn a. Chu chu tun Financial Year zawh hma hian pekchhuah vek tum a ni.

Member zahawm tak Pu Ramthanmawia zawhbelhna – “Sesih khua-ah doctor min pe leh thei ang em?” tih kha, “pe thei dawn” tih kha ka chhanna a ni. Sesih doctor sawn a nih khan kan pe nghal a, mahse kan pek nghal kha thlathum chauh Sesih ah a lo va awm a, ZMC an graduate vel leha thlak nghal tura kan tih pawhin, min bansan ta tho a. Tunah hian pek leh tur midang kan ngaihtuah mek a ni. Tichuan, Opposition Bial kan enhrang lo em em a, Sesih-a kan PHC Doctor kha sawlamah awm a tul tlat mai a. Chuvang chuan, midang kan pe leh vat dawn a ni.

Pu TBC Lalvenchhunga, he House Member zahawm takin min zawhna – “Sairang PHC ah doctor min pe thei ang em?” a tih kha chu, ‘doctor indaih ve leh kan pe ang’ tih kha ka chhanna a ni. Tin, x-ray khawl dahna building hi MHSSB atangin ngaihtuah mek a ni. Ka lawm e.

PU LALCHHANDAMA RALTE, OPP. LEADER: Pu Speaker, nichina ka zawhna kha a tam deuh avangin Darlawn CHC doctor neih loh thu kha min chhang ve lova. Kan Bial ten an lo en ve si a, min chhang ve ta si lova. Khalai kha min chhang thei em?

HON. SPEAKER : Hei, kan session hmasa dar 11:30 a lo ri ta a, zawhna laklawh kha kan Health Minister kha chhang turin kan sawm law law dawn em ni ang? Member ten an duh thu an sawi a. Aw le, anih chuan kan Minister, a theih ang anga chhang turin i sawm ang.

PI LALRINPUII, HON. MINISTER: Pu Speaker, ka lawm e. Pu Chhantea min zawhna kha – ‘Darlawn CHC-ah hian doctor indaih vel leh pek tum a ni’ tih kha ka chhanna a ni.

Tin, Pu TBC-an min zawhna pakhat - Administration doctor ho kha - hei hi chu amah ka lo hriattir mai dawn nia.

LAYING OF PAPERS:

HON. SPEAKER : Aw le, tunah chuan *Zawhna & Chhanna* hun a zo a, *Laying of Papers* ah kan kal ang a. Pakhatna - Pu Lalduhoma, Chief Minister zahawm takin hengTE hi House-ah rawn lay se -

- 1) Finance Accounts 2022-2023, Vol. I relating to Government of Mizoram.
- 2) Finance Accounts 2022-2023, Vol. II relating to Government of Mizoram.
- 3) Appropriation Accounts 2022-2023, relating to Government of Mizoram
- 4) Report of Director of Local Fund Audit on the Accounts of Local Authorities for the year, 2018, 2019-2021.

PU LALDUHOMA, HON. CHIEF MINISTER: Pu Speaker, i phalna leh he House remtihna in heng Report-te hi he House dawhkanah hian ka lay e –

- 1) Finance Accounts 2022-2023, Vol. I relating to Government of Mizoram.
- 2) Finance Accounts 2022-2023, Vol. II relating to Government of Mizoram.
- 3) Appropriation Accounts 2022-2023, relating to Government of Mizoram.
- 4) Report of Director of Local Fund Audit on the Accounts of Local Authorities for the year, 2018, 2019-2021.

Ka lawm e.

HON. SPEAKER : A copy sem ni se. Aw le, kan dawngkim tawh a. A pahnihaah kan kal ang. Pi Lalrinpuii, Minister zahawm takin heng Rules te hi House dawhkanah rawn lay se –

- 1) Zoram Medical College Memorandum of Association, 2024.
- 2) Zoram Medical College Regulations, 2024.
- 3) Bye-Laws of Zoram Medical College, 2024.
- 4) Zoram Medical College (Recruitment & Conditions of Service for Teaching Faculty) Rules, 2024.
- 5) Zoram Medical College (Recruitment & Conditions of Service for Non-Teaching Employees) Rules, 2024.

PI LALRINPUII, HON. MINISTER: Pu Speaker, i phalna leh he House zahawm tak remtihna-in Health and Family Department hnuiaia heng rules te hi ka rawn lay e -

- 1) Zoram Medical College Memorandum of Association, 2024.
- 2) Zoram Medical College Regulations, 2024.
- 3) Bye-Laws of Zoram Medical College, 2024.

- 4) Zoram Medical College (Recruitment & Conditions of Service for Teaching Faculty) Rules, 2024.
- 5) Zoram Medical College (Recruitment & Conditions of Service for Non-Teaching Employees) Rules, 2024.

Ka lawm e.

LEGISLATIVE BUSINESS:

HON. SPEAKER : A copy sem ni se. Aw le, kan chankim tawh chuan, Business dang - *Legislative Business*-ah kan kal ang a. Vawiin hian sawrkar hnuaia Business pakhat sawiho tur kan nei a. Bill copy te hi Memberte hnenah sem lawk vek tawh a ni a –

“*The Mizoram Water Resources (Management and Regulation) Bill, 2024*” hi a Bill neitu Pu PC Vanlalruata, Minister zahawm takin House-ah introduce phalna rawn dil turin i lo sawm ang u.

PU PC. VANLALRUATA, HON. MINISTER: Pu Speaker, i phalna leh he House zahawm tak remtihna, “*The Mizoram Water Resources (Management and Regulation) Bill, 2024*” hi he House-ah introduce ka rawn dil e.

HON. SPEAKER : Aw le. A bill neitu Minister zahawm tak khan House-ah introduce a rawn dil a. Kan remti em? (*House-in a remti a...*)

Aw le. Kan phalsak chuan, tunah rawn introduce-in, sawiho tura rawn move nghal turin Minister i lo sawm ang.

PU PC. VANLALRUATA, HON. MINISTER: Pu Speaker, ka lawm e. Vawiina Bill ka rawn putluh hi sawrkar hmasa atang buaipui tawh a ni a. He sawrkar hian sawrkar hmasa ten thil tha tak an lo buaipui tawh chu a rawn bawhzui nghal a.

Mihring kan lo pung zela, tui mamawhna a sang chho zel a. Tui thianghlim intur a ni emaw, lo leh huana hman tur a ni emaw, construction leh thil dang danga hman tur pawh nise, kan tuihna leh ground-water te hi management fel tak hmanga enkawl a tul hle tawh a. Hei, khawvel ram hrang hrang leh India ram ngeiah pawh kan hria a, tui inchuhna te a nasa thin hle a. Keini Mizoram hi kan vannei a, Pathianin tui thatak min pe a. Amaherawh chu, khawvel thang zel turah hian kan tui neihte hi enkawl na felfai tak sawrkarin a neih loh chuan, harsatna kan tawh thei a. Chuvang chuan, management leh regulation fel tak neih theihna turin he bill hi vawiina sawiho turin House-ah ka rawn introduce a ni e. Ka lawm e.

HON. SPEAKER : Minister zahawm takin a Bill chungchanga sawi tur awmte sawiin, a Bill putluh chhante min hrilh tawh a. Tunah kan sawiho ang a, Member pakhatin minute engzat nge kan sawi ang? Minute 5 nge, minute 10 nge? Aw le, member pakhatin minute 5 zelah maintain kan tum dawn nia. Tunge han sawi hmasa ang? (**Dr. K. Beichhua:** Pu Speaker, Bill kha a rawn move bawk si lova, introduce a move turah ka lo ngai a.) Anih leh rawn move sela, i lo sawm leh ang.

PU PC. VANLALRUATA, HON. MINISTER: Pu Speaker, ka rawn move nghal a ni e.

HON. SPEAKER : Tichuan Memberte tan a sawi theih nghal ta a, tunge sawi hmasa ang le? Pu Rohmingliana ilo sawm ang.

PU R. ROHMINGLIANA: Pu Speaker, ka lawm e. Kei pawh ka hming bulah khan 'R' ka dah tel ve tho a nia.

Pu Speaker, *Act* a nih hmaa Bill han sawi hmasa ber tur ka ni a, ka lawm hle mai. Minute 5 lek a ni a, hun hi a tawi thei viau mai a. Hei hi uluk takin ka chhiar chhuak dap a, Bill anih laia chhiar chhuah kha a hlu viauin ka hria a, an ziah dan pawh hi a fel fai tha hle mai a. A thu chhungril, a laimu ai mai pawh hian a ziah dan hrim hrim pawh, a indawt dan te leh thil engkim mai hi a fel fai hle mai a.

Hemi ka sawi rual hian, kan Minister zahawm tak khan min lo sawifiah sak tur eng eng emaw point, ka thusawi lai hian a awm dawn a, chu chu khawngaihin min lo chhinchhiah sak zel turin ka ngen hmasa duh a.

A hmasa berah chuan *note* panga angin a insiam thla a - A hmasa berah State Water Resources Council a awm a. He State Water Resources Council hi a pawimawh viau mai a, a consist ho pawh *Chairman* te, *Vice Chairman* te, a tha hle mai a. Amaherawhchu, pahnihna lai teah hian "*Councils shall meet at least once in a year*" tih laia '*at least once*' tih kha ka la duhthawh deuh a, a aia tam deuhthe han ni thei se la. Council Chairman te an buai si a, Vice-Chairman te, Member-te pawh. Chuvang chuan, hei aia tam te han awm se la; he Bill hi a tha riau mai si a.

Tin, a dang lehah chuan, '*Water Resources Development Management Authority*' tih zawng khan a rawn kal leh a, he authority ah pawh Chairman te, Co-Chairman te leh member te han en hian, an kalpui tum dan pawh a tha hlein ka hria a, he *Act* ni mai tur hi.

A dawt lehah chuan, *Department of Working Group* an awm leh tur te pawh hi a tha ka ti a, hei hian an monitor dan tur pawh kha a rawn sawi Chiang viauin ka hria a. *District Water Committee* in a chhunzawm leh ang a, helaiah pawh 'Chairman tur DC' han tih lai te, member te, member secretary te pawh a inhmeh viauin ka hria a. He Bill rawn

siam chhuahna danah hian uluk taka zira siamchhuah niin ka hria a. Sawisel dawn pawh ni ila, sawisel tur a vang ngawtin ka hria a. Amaherawhchu, khawvelah engkim famkim a awm lova, helaiah hian kan Minister zahawm tak khan min lo chhinchhiah sak se la nakinah wind-up hunah te pawh han sawifiah se ka duhlai deuh te a awm a.

Heta a tawp bera, 'Village/Local Water Resources Committee' tihah khan *Chairperson*-ah 'President Village Council/Chairman Local Council' tih a ni a, *Secretary*-ah khan 'YMA President' han tih tawng mai lai kha, YMA hian Branch, Section, Sub-Headquarter leh Central te, chi hrang hrang a nei a, village pakhtah khan YMA Branch kan ti dawn anih pawhin, Branch pahnih - pathum te a lo awm a. Chuvang chuan, a khawi ber nge a kawh? 's' a telh bawk si lova, '*President*' tih kha a ni a, President pakhat chauh a kawb bawk si a. Chuvang chuan, helai te pawh hi min han clarify sak se.

Tin, a dang leha chuan kan tuite humhalh a tul em em a, helai ka chhiara ka chian loh deuh lai chu - tuin emaw a LSC, ama ram area-ah inhmun emaw, eng emaw ban khur emaw a lo lai ta a, tui tha tak mai a lo chhuak a. Chu tui chu he *Act* tur, he Bill hian a rawn huam dawn em? He thuneihna hian a rawn keng tel dawn em? Village level thuneihna hian a rawn keng tel ang em? Inchuhna chu a awm miah lo ang, dispute chu a ni lo ang a; LSC area a ni miah a. Khalai kha min lo chhinchhiah sak se ka duh deuh a.

Tin, Pu Speaker, thingtlangah leilet hmunte a awm a, tun hunah pawh a changtu Minister zahawm tak department chan thoah khan PM-KUSUM hnuaiah te solar water pump chungchangah te pawh hma an la nasa a, 'sawrkah hmasa hma laknate a kal mek' tihte pawh ka hria a. Heng agricultural land atana tui an pump chhohna turah te pawh hian, 'eng che nge a inrawlhna tur' tih lai kha helaiah hian duh angin a la chiang lo deuh hlekin ka hria a. Tin, thingtlanga tui lakna tur chungchangah te, gravitation a ni emaw, solar pump a ni emaw, sangha dil khuah chungchang thleng khan tlema chiang lo deuh awmin ka hria a ni.

Amaherawhchu, Pu Speaker, a tawp berna atan khalai 'chianglo' ka han tih lai kha he Bill hi *Act* a nih hnuaiah hemi hmang hian *Rules* te pawh siam a la ni leh turah ngai ta ila, chutah te pawh chuan an rawn siam chiang turah ngai ila. Chuvang chuan, sawi tur tam viau mahse hun a tlem em a, khalai te tal kha min rawn sawi chian turin ka ngenna a ni e. Ka lawm e.

HON. SPEAKER : A lawmawm e. Tunge sawi duh dang kan awm em? Pu Lalrinsanga Ralte, ilo sawm ang.

PU LALRINSANGA RALTE: Pu Speaker, ka lawm e. Vawiinah kan Minister zahawm takin, "*The Mizoram Water Resources (Management and Regulation) Bill*,

2024” a rawn pulut hi a lawmawm ka ti takzet a. He bill kan sawiho tur hi sawrkar hmasa lam, (2023 kum kha niin ka hria a) khalaia buaipui leh siam a ni a. Tin, sawrkar hmasa atang pawh khan mihring kan pung chho a, tui kan mamawhna a pung chho zel a, indaihlohna a nasat em avanga ngai pawimawha siam a ni a. Chutah chuan, session lai te a nih loh avangin, bill han put luh te a rem lova, *Ordinance* hmangin kalpui a niin ka hria a. Kan Minister-in hetiang thil pawimawh tak mai, kan ram tana rohlu tak tur mai bill tha a rawn kal nawn pui hi a lawmawm ka ti takzet a, a changtu Minister chungah pawh lawmthu ka sawi a ni.

Pu Speaker, he bill-ah hian thil tam tak a inziak a, minute 5 chauh thusawina hun kan neih avangin sawi vek sen a ni dawn lova. He bill hi a pawimawhin, a tha ka ti takzet a. Mizoram-ah phei chuan tuia harsatna namen lo kan tawh tan a ni a, Tlawng te, Tuirial leh hmun hrang hrangah tuihna a tlem chak em em mai a. Chuvang chuan, ‘rain-water harvesting’ kan tih te, *ruahtui van-tla* dawn khawlna tur kan ruahmannaa Dan felfai leh tha tak hmanga kan kal vat hi a tulin ka hria a.

Tin, a neinung zawk leh a thei ten khawl hmangin lei te verhin, lei hnuaia tuite duh duhna hmuna kan lakchhuah te hi a fuh lovin ka hria a. Heng zawng zawng Dan hnuaiah a han awm tur hi a lawmawm ka ti takzet a. Hetiang Dan tha tak mai kan Minister-in a rawn pulut hi lawmthu ka han sawi nawn leh a ni.

Kan sawi tawh ang khan, mihring kan pung chho nasa khawp mai a, tunah chuan state danga tui inchuh avanga buaina namen lo chhuak te pawh kan hre thin a ni. Heng hi kan ramah pawh hian ‘a tleng lovang’ tih sawi theih a ni lova. Hun a lo danglam chho zel a, ruahtui tlak a mumal lova, kan khaw awmdan te a mumal lo chho zel a, harsatna namen lo hi kan tawh chho ve vak thei a. Hetianga inven lawkna tur bill tha tak mai kan neih vata, *Act* a rawn niha, Dan tha tak hnuaia fimkhur taka kan kal vat hi a tul takzet a. Opposition leh Ruling pawh hian he bill hi a tha kan ti tlangin ka ring a.

Tin, Zoram mipuiah pawh hian *awareness* tha tak kan neih vat hi a tulin ka hria a. Inzirtirna mumal kan neih loh chuan, heng dan tha tak tak kan neihte pawh hi awmzia awm lovin a chhuak thei thin a. Chuvang chuan, he bill hi kan passed-a Dan kan hmang chho dawn a nih pawhin khauh taka kenkawha, hei hi kan ram leh hnam tan leh Mizoram mipuite tan thil tul a nih a vangin, *awarness* te kan neiha, kan Dan te kan kenkawh that viau ka beisei a ni.

Tin, Mizoram kan vannei khawp mai a, Pathianin ruahtui tha tak min pe a, tunah chuan kan duhkhawp kan la nei a ni mai thei a. Tunah hian PHE tui sem ringawt kan la ring a, keimahniah hian tui kan khawl ve theihna tam tak a awm dawn a. Chungah te pawh chuan leihnuai tui kan lak chhuah dan tur te leh huan leh ram a kan hman danah te pawh Dan tha tak hmana, he kan bill hian mipuite min zirtira min khuahkhirh hi a tul tak zetin

ka hria a. Kan Minister-in he bill tha tak a rawn pulut hi a tha tak zetin ka hria a ni. Pu Speaker, ka lawm e.

HON. SPEAKER : A lawmawm e. Sawi duh dang kan la awm em? Aw, Pu F. Rodingliana ilo sawm ang.

PU F. RODINGLIANA, HON. MINISTER: Pu Speaker, ka lawm e. Hei, Dan tha tak angin a lang a. Chutih rual chuan tuna a lan dan ang hian ennawn leh deuh ngai tlem te pawh a awmin ka hria a; ‘zg’ leh ‘zf’ te pawh hi a ruahman tu hmasa te hian ‘an uluk lo deuh em aw’ ka ti a. Dan kan siama mahni inphuar vak a hi buaithlak ka ti a. Zoramah hian Dan kan siam a, AMC te pawh hi a tirah kan duh em em a, vawiin niah chuan a sawiseltu kan tam leh viau tawh a ni. A chhan chu, in kan sak dawnin mahni thu pawhin kan sa thei tawh lova; ban khur kan laih dawn pawhin mahni thuin kan lai thei tawh lova. He Dan hi kan passed a nih chuan, hei aia mipui-zalenna deuh hi Pu Speaker, kei chu tlem siam danglam ngai ka ti a. Thingtlang lam, kan zokhua unaute hetiang Dan-a han phuar vak te hi a fuh chiah lo deuhin ka hria; kan ruahmanna hi tlem chuan uluk deuh ngaiin ka hria a. Dan kan nei a nih chuan, kan hman a ngai dawn a; chu Dan chuan min tizalena, Dan tam tak chuan harsatna ata awlsamnaah min chhuah thin a. Chuvang chuan, a then hi siam danglam ila; a ngau ngau lo deuh hian pass tha ka han ti deuh a.

Chutih rual chuan, ‘kan ramah tuihna a tlem’ kan ti a, a dik khawp mai. Pa-pakhatin, “Aizawl Venglai-a tuihna saw thing a tam lai aiin thing a tlem hnuin tui a tam daih” a ti a. Chutiang deuh chuan, tuihna te hi a tlem leh a tamah chuan Pathian thu a niin ka hria a, “a tlantu an tam poh leh a pung chak mai” an ti a. Chuvang chuan, heng kan Dan siamah te pawh hian a tuihna tamna te pawh hi belh tha leh ila, vawiinah hian ngaihtuah nawn ngai a awm nualin ka hria a.

Chuvang chuan, Pu Speaker, thil pakhat lek ka han sawi duh chu - mihringte hi, ni e, inphuar vak thei pawh kan ni lova. A chhan chu, Dan a tam poh leh bawhchhiat tur hi a tam a; Dan hi mite tana awlsam zawnga kan siam te pawh a ngai a.

Nichinah khan Ruling leh Opposition te pawh kan sawi thin a; kan Opposition lam te hi kan duat a, an pangchang deuh mah mahin ka hria a. Chuvang chuan, ngaihtuahna te pawh hi hman nawn ngaiin ka hria a. He Dan kan siama hi a tha ka ti a, chutih rual chuan, tuna mi ang ngau ngaua han passed hi a uihawm deuhin ka hria a. Zokhaw lama kan unaute - *village-usher* te a la awm leh a ni. Chutiang te chu a nih a vangin, ‘kan tlin ang em, Pu Speaker?’ ka han ti deuh a ni. Chuvang chuan, ‘ngaihtuah nawn a ngai lo maw’ ka ha ti a ni. Ka lawm e.

HON. SPEAKER : Er. H. Ginzalala ilo sawm ang.

PU H. GINZALALA : Pu Speaker, ka lawm e. Sawi tur a tam khawp mai a, “*The Mizoram Water Resources (Management and Regulation) Bill, 2024*” hi a tha ka ti a, passed ngei pawh nise kan duhpui a. A-buaipuitute pawh hian an buaipuina a rei khawpin ka hria a, kum 2 - 3 kal ta atanga buaipui anni a. Stake-holder Consultation Committee te pawh kha an rawn nei a, keimah ngei pawh ka kal tawh a ni. Chutiang chuan, rim tak leh hah takin an lo thawk a, alawmawm ka ti a. Vawiin niah a zar kan zo dawn tain ka hria a, lawmthu kan sawi hmasa ni ta sela.

A subject hi a zau khawp mai a, minute 5 chhunga sawi atan chuan sawisen pawh a ni lo ang a. Ngaihpaawimawh point hnih-khat bak hi a sawi theih dawn lova. Eng pawh ni se, Member tamtak te hian ‘hriatsual an nei em aw’ tih lai te pawh ka nei a. A chhung thu hi chipchiar takin ka chhiar hman bik lova, ka hriat ve dan a dik em tih phei chu ka hre lo nain.

Hei, LSC huam chhungah tuihna a lo awm a, chu chu ‘tu ta tur nge’ tih lai te kha zawhna te kha a awm deuhin ka hria a; a concerned minister khan a rawn chhang turah ngai ila. Kan sawi thin dan pakhat chuan, ‘he Dan hian a chhuh dawn lova, a neitu kha a recognise dawn bawka a ni’ tih lai te pawh kha kan ngaihtuah a ngai a. Lo chhuh ngawt ta se, dispute nasa lutuk kha a chhuak dawn a. ‘Hei hi i ta a ni e; I ram chhunga mi a ni e’ tia permission pekna tur Dan te pawh kha a telin ka hria a.

Tin, Member thenkhat ten, ‘zalenna min phuarna a ni mai lovang maw’ tih lai te pawh kha, ngaihtuahna awm thei deuh a ni a; hei chu ‘a ni chiah lo ang em aw’ ka ti vel leh thung a. Nichina ka sawi ang tho kha a ni a. Engpawh ni se, ka han sawi duh chu, ground-water resources chungchang te pawh kha a rawn sawi kai a, member tam takte pawhin in ngaihdan in rawn sawi tawh a. Mizoram hi kan vannei khawp mai a, ground-water resources ah hian ‘kan potential hi a tha rapthlak a ni’ tih hi ka hria a. A chhan chu, ruahtui tamna ram kan ni a, kan underground-water resource tha lutuk mai hi kan exploit-a, economically-a hmasawmna atana kan hman hi thil pawimawh tawp a ni. Chu chu a nih avangin, he bill hi a tha ka ti a, chutih rual rualin member thenkhat ten in rawn sawi chu, a duh apiangin duh dan dana an han tih pawp pawp lai pawh kha, zep lohah chuan a fel hlel ve a ni. Chung zawng zawngte pawh chu he Dan hian a enkawl dawn a ni.

Entirnan - mipakhatin a ram chhungah ground-water lei a verh a, a lachhuak a, a bul lawk meter 4-5 ah kha a thenawmpa in a rawn tih ve kha chuan, lei chhungrila ground-water reserve kha a intawm si a; khatiang te te kha nakin hunah buaina awm thei a nih avangin, hetiang dispute awm theiah pawh he Dan hian min veng dawn a ni.

Tin, ‘concept dik lo deuh a awm em aw’ ka ti a. Ground-water resource kan nei chiah a, ‘a deplete ang em aw; a chuti khati ...’ ti tawka hi an tam em em a ni. India ram chhim lam - Andhra Pradesh te, Karnataka te pawh ground-water ah hian an lo innghat khawp

mai; State dangte pawh population tam zawkte an ni a, million eng emaw zat hian he ground-water hi innghah nan an lo hmang a, tin, an ramah hian tuihna te pawh an nei tlem a ni. Amaherawhchu chuti chung pawhin underground-water resource hi nasa takin an harvest a, an exploit a, hmasawnna atan an hmang tangkai em em a ni. Chu chu anih avangin, kan ramah ngei pawh hian dan ang taka kan ti thei tur hi a pawimawh ka ti a, a lawmawm ka ti a. Irrigation ah te, drinking ah te leh thildang dang Industry-ah te pawh hman theih a lo ni dawn ta a.

Amaherawhchu chutah chuan department lamin emaw, a mawhphurtu hrang hrang an rawn sawi te khan an rawn monitor dawn ta a ni. ‘Hman tangkai theih a ni’ tih avanga excessive lutuk a kan exploit khan hetah kan underground resource te a tibuai thei a, depletion thleng te pawhin a awm thei a ni. Chung zawng zawngte hman min phalsak lai khan, a tawh kha min hrilh dawn a ni. Chu chu anih avangin, hei hi a pawimawh khawpin ka hria a, hei hi nasa taka kan kalpui, kan tih chhoh zel pawh hi a tulin ka hria a.

Tin, khua leh khua inkarah pawh hian intih thiamlohna hi a awm reng tawh a ni, tunah hian. Chung zawng zawng pawh, khaw pakhatin a ram chhunga ground-water emaw, suction-water emaw thuneihna a neih rual rualin, khaw dang nen an inkara dispute a awm hma khan District Level Committee ... (a hming kha ka sawi thei chiah lova) hetah hian a inziak vek a, chu chuan a chingfel dawn a ni.

Sawi tur a tam si a, Pu Speaker, kawngpui kan sial dan kawngah pawh hian a neitu-chan chang kan awm loh avangin kan buai a ni. Chu chu he Dan hian a rawn kengkawh tawh dawn a, tuihna kan humhalh loh nasat zia te pawh hi kan hria a, he Dan hian a rawn enkawl tur hi a lawmawm ka ti a. Chuvangin, pass-pui ngei ila, tha ka ti. Pu Speaker, ka lawm e.

HON. SPEAKER : Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e.

Hei, vawiinah kan Minister zahawm takin Dan tha tak mai, ‘a hma daih hian lo neih awm tak a nih hi maw le’ han tih mai tur a rawn chhawp chhuak hi a lawmawm ka ti khawp mai a. Vawiinah hian kan Minister ngaihtuahna puitlin zia te, sawrkar hmasain rei tak a lo chai tawh leh a tih puitlin hman chiah loh, Assembly-a Bill introduce hman loh rang taka sawrkar hnu lawkah an rawn chhawp chhuak a, a ma sawi dan taka lang tlang takin engkim rawn sawia, Bill a rawn pu lut hi a lawmawm ka ti a. Puitling zia ni te pawhin ka hria a, a fakawm hlein ka hria. A bill hrim hrim pawh hi an zir ngunin ka ring a; a chhan chu, sawrkar hran a lo nih tawh chuan, sawrkar hmasa tih te chhunzawm tur chuan zir uluk a ngai lo thei lo ang a. Chunga engkim kal tlanga due-process zawm kima thil a rawn ti hi a lawmawm a.

Chutih mek lai chuan kan Minister zahawmtak pakhatin pass duhlohna a rawn ti ve leh tlat mai a, *no-confidence* hi minister leh minister hian an move mai dawn em maw ni le tiin kan tha a lo khur deuh mai a; dawihzep deuh chu! Engpawh nise kalphung tharah hi chuan langtlang deuha thil tih te pawh an duh a, an ngaihtuah dan kha tun hma a tih ngai loh deuh te pawh khan an ti ah ngai ta ila. Ka hre thiam em em a, an rilru that zia lanna te pawh a niin ka hria.

He Dan pawimawh em emna nia ka hriat chu – ‘mapping of surface water resources and ground water resources’ tih hi a ni. Heng te pawh hi thil tul tak, hetia Dan/Bill ah a rawn chhuah hnuah ngaihtuahna rawn ti thar chawp pawh a ni deuh a. Keimah bikah chuan, he *mapping* hi a pawimawh khawp mai a, kan ram dinhmun leh ground-water Mizoram in kan neih dan te, surface-water kan neih dan zirchianna, uluk taka mapping kha he Dan hnuaiah hian neih a ni dawn a. Tin, State-water information system te kan nei dawn a, a tunlai khawp mai a. *Digital administration* te kan ti a, hei pawh hi digital system-in fel tak leh awlsam takin water information system atangin tui chungchang hriatna kan la thei dawn niin a lang a. Project siam turte, hmalam atana ruahmana siam turte tan pawh a tangkai thlawt ang tih ka ring a.

Tin, pawimawh em em tur, State Water Plan mai ni lo, *Integrated State Water Plan* hi integrate ngai a ni, tui atana ruahmanna siam hi. A chhan chu, a hnuai lamah te a lo inpawh a (nichina ka hmaa member zahawm takin a sawi ang khan) khatianga integrated state water plan alo awm ang a, District-level ah ruahmanna alo awm ang a, village-level ah ruahmanna alo awm ang a, chungah chuan authority te te kha ‘a inkhai chhawn dan fel tak awm dawn a ni’ tih he kan Bill ah hian Chiang takin a rawn inziak a. An thu neihna te a rawn inziak chian bakah disputes, eng emaw intihbuai leh inkhin thu ah pawh Court a kal rup rup lovin, District Settlement Committee khan ‘60 days chhungin disputes a awm pawhin, he kan Dan hian a settle ang’ tih a ni a, a lawmawm hlein ka hria a. Tin, village level ah pawh village level tui chungchanga appropriate authority khan ‘ni 30 chhungin disputes a awm chuan an settle ang’ tih te kha a ni a. Dan hi kim pawh hi a kim tha hlein ka hria a. Vawiinah hian kan zavaiin, (kan P&E Minister zahawmtak tiamin) pass vek thei ila tih te pawh ka han rawt tel duh a.

Chutih mek lai chuan, nichina Engineer R. Rohmingliana sawi kha a pawimawh a, a practical-a problem awm thei nghal chu a ni a. ‘President YMA’ han tih ringawt kha, khaw khat chhungah joint YMA President te an lo awm a, khaw thenkhat ah branch pathum te a lo awm a, village pakhat hnuaiah. Khangah khan ‘President, nominated by...’ tih emaw, ‘Branch YMA President, nominated by appropriate authority’ tih emaw, ‘by government’ tih emaw te khan thlak te a la rem a nih chuan, khalai eng emaw deuh awm thei te kha kan sukiang nghal mai turah ka ngai a. He Bill hi tha ka ti a, a move-tu pawh ka support e.

HON. SPEAKER : Professor Lalnilawma ilo sawm ang.

PROF. LALNILAWMA, HON. MINISTER: Pu Speaker, ka lawm e. Hei, Bill tha tak mai putluh kan han sawiho a ni a, ‘hmasawmna lamah ke kan pen zel a ni’ tih a lang a, a lawmawm ka ti khawp mai. Ka han zirchiang a, kan zir chhuak ve a, he Bill tha tak hi (House member ten min lo hriat pui ula kan duh chu) nikum September, 2023 khan ‘*The Mizoram Ground Water (Control and Regulation) Act*’ PHE Department-in a put luh kha pass fel niin, *Act* a siam a ni a, a rules pawh Law lampang *vet* kan dawng chiah a, chu chu min lo hriatpui hrim hrim ula. Amaherawhchu, hei hi chu *ground-water* chiah a ni a, tuna kan Bill sawi meka hi chu water resources - ground water emaw, surface water emaw a rawn huam a, a huam zau zawkah ngai ta ila. Amaherawhchu, ka rilrua lo awm chu Pu Speaker, he Bill-ah hian nikum lawka kan pass tawh si, tun thla tir maia Law lamin min rawn pawmpui nen khan ‘in conflict a awm thei em’ tih pawh hi, he Bill, rules kan siam hunah pawh kan pass hnua *Act* alo nihin, rules kan siam hunah pawh kha kha min lo hriatpui ula ka duh a.

Pu Speaker, ni e, a formation hi ka han en a, a State level leh Council level bakah a authority ah chuan Rural Development Department a tel a. Chutah chuan, a district-level ah khan Rural Development Department telh a ni tawh lo a, khang te kha telh theih ni se. A chhan chu, Rural Development Department hian tuihna siam chungchangah leh hemi tui chungchangah hian priority kan pe a, chungte chu anih avangin District Level ah hian Rural Development Department kha telh ve ila a that ka ring a. Tichuan, Pu Speaker, hemi a lan dan hrim hrimah hian, a tui awmsa leh a surface leh ground water kha kan focus bik a. Ka rilru a lo lang chu, a source lampanga ‘a management’ kan tih hi ‘ngaihpawimawh deuh a tha em aw’ tih kha ka rilru ah a lang a. A chhan chu, hmanni ka bialah ka han kal a, khaw pakhat Chalfilh tlang atanga tui an lakna kha, a neitupain, ‘in lei loh chuan, kumin ah ka vat dawn’ a ti a, ‘E.. a vah chuan, a chereu mai dawn si a, tuihna kan nei tawh dawn lo a nih hi’ tiin an buai nghal der a ni. A tuihna lam pawh hi wawiinah kan incorporate hman tawh lova, nakinah *amend* te a la ngai ang a, chungah chuan ‘a source lampang hi ngaihtuahna hmang tam ta ila’ tih kha kan point out ni se.

Tichuan Pu Speaker, grammar-thiam kan ni lova, a grammer eng emaw edit ngai a awm nual a; ‘*shall*’ leh ‘*will*’ tih te pawh kha a awm nual a. Hei phekk 10-na pawh khan a thenah ‘*shall*’ kan hmang a, a thenah ‘*will*’ kan hmang a, ‘a eng zawk hi nge..?’ tih te pawh kha grammer thiam ten nakinah kan final dawn hunah rawn ni se a that ka ring a.

Tichuan, phekk 9-na – ‘Water Resources Development and Management Authority’ tih, serial no. 6, 1-na ah khan – ‘*The authority shall have the power...*’ tih a ni a, ka rilru a lo lang chu, kha khan power chu a nei tehreng mai a, amaherawhchu, ‘*shall give the power*’ ti zawk ta se. Hetah khawn te, charge siam te kha, ‘*shall give the power*’ tih khan awm zawk ta se, tih te ka rilru ah a awm a. Kha khan power chu a nei tehreng mai a, amaherawhchu, ‘*shall give the power*’ te han ti ta zawk se. Tin, meeting hun tur

chungchangah, ‘*authority shall meet at least twice in a year*’ tih te, ‘*once in a year*’, tih te kha chu a *Act*-ah hian awm lovin, a Rules siam hunah khan awm ta zawk se a fuh zawk ang em aw, heta inphuar tir tut ai chuan tih te kha.

Pu Speaker, phok 14-naa - ‘surface water’ tih leh, a dawta ‘ground water’ tihah khan, a department tur bik, ‘State Irrigation & Water Resources Department’ tih hi identified sa a ni a. Amaherawhchu, nakinah conflict a awm maithei a, Subject kan insiam dan azirin. (Pu, Speaker, hun tlem te min pek belh la ka lawm khawp ang.) *Entirnan*: tuna Bill leh *Act*-ah a department kan specify sa kha chuan, nakinah buaina tlem a awm theiin ka hria a. Chuvang chuan, a department kha specify sa ta lo ila, Water Authority emaw, a Council-in emaw kan department subject a zir khan a sign turah dah mai ta ila a tha awm mang e aw ka ti a. A chhan chu, PHE subject chu -*drinking water* a ni. Chutih laiin ‘surface water’ kha *Irrigation & Water Resources* chungah a ka dah khan, kan tui lakna Tlawng dung hi PHE kutah te kan dah loh chuan a buai ngei ngei dawn. A department inchuh lam ni lovin, a bill-ah hi chuan a department bik kha chu *silent* ta i la, “*Council* leh *Authority* khan a subject azirin rawn sem fel mai se a tha lo em ni?” tih kha rilruah a lang lian a, ka han point out a ni.

Hun a tawp tawh a. A thenah ‘Village Council’ leh ‘Local Council’ kan tih kha, a tawp lamah khan ‘Village Council’ tih chauh kha kan telh ta a. A Bill-ah hian, nakinah a *Act*-a a awma, kan pawm hnuah pawh ‘Local Council’ tih te pawh kha *oblique*-ah khan telh chho zel ila. Khangte kha ‘hmaih palh a ni em aw’, tih te ka han point out ni se. Pu Speaker, ka lawm e. (*interruption*)

PU F. RODINGLIANA, HON. MINISTER: Pu Speaker, ka pawm lo ni lovin, a Dan ah hian a hma atanga kan lo sawi tawh, *entirnan*: Miin tui a lo verh chhuak ta a, a verh chhuahna bulah khan (nichina kan Member Pu Laltea sawi tawh angin) tuihna a tam a ni, Mizoram ah hian; chu chu a complain ve theih tlat mai a ni. Industry bikah han ti ta i la, Industry chuan ram tlem te tein kan insem a. Kan ram chhungah lo verh ve dawn i la, kan zawhna ah hi chuan, ft 100 aia hnaiah hi chuan an intibuai an ti a. A nihnaah chuan, a tihmasa kha an vannei dawn a. Chung laite chu siam that ngai a awm a.

Tin, ‘a-chairman te hi an lal hlawm lutuk a’ tia complain kan lo nei tawh a, chu chu a ngai ngaiin a la awm a. Khang te kha tlem han siamrem a ngai ka ti a. A tak taka hman dawna thil theih loh a awm nual avang leh, he Bill hi ka object ni lovin, hman tura siamthat ngai lai leh industry neituite tana harsatna awm thei thil tam tak a awm avangin, kha lai kha ka rawn mention zawk a ni e. Pu Speaker, ka lawm e.

HON. SPEAKER : Sawi duh kan la awm em? Pu Rasik Mohan Chakma i lo sawm ang.

PU RASIK MOHAN CHAKMA: Pu Speaker, ka lawm e. “*The Mizoram Water Resource Management & Regulation Bill, 2024*” hi kan chhiar tawh a, Member zahawm tak takin an sawite kan ngaithla tawh a. A pawimawh em em a. Tin, he Bill hian Mizoram chhunga Autonomous District Councils-te a huam lova. A huam loh chhan chu - 6th Schedule-ah hemi subject-ah hian *Dan siamna-power* kan neih ve vang a ni a. Khami rual khan, international boundary-ah water resource chungchang kha a tel ve bawk si a. Kan area-ah chuan Bangladesh nen kan inrina border-ah Theka Lui leh, Tlabung area-ah Tharina Sazuk Lui te a awm a. Tunah pawh hian tui hmanna chungchangah buaina kan tawk zeuh zeuh a, Bangladesh border guard ten buaina an siam a. Tam takah chuan kan BSF ho zawk hian harsatna min siam thin. District Council-ah he Dan hi kan la nei lova. Kan han zir chiang ang a, keini pawhin siam ve ngei kan tum a. Chuvangin, hei hi tha ka ti a, a tangkai dawn lutuk a. Tuna kan buaina te pawh tlem chuan a zangkhai phah ngei ka beisei a ni.

Mahse, Pu Speaker, thil pakhat chu - he Bill hi ‘Official Bill’ a ni a, hreh chung chungin ka han sawi ve hram hram teh ang ka ti a. Kan Minister-in Official Bill a rawn chhawpchuah kha a ni a, Cabinet-ah an sawi ho ngei tura pawh ngaih a ni a. Chutih laiin Minister dangte’n a nilo zawng emaw, suggestion dang daih emaw an han sawi khan, ‘Cabinet-ah an sawiho lo emaw ni aw’ ka ti a. Official Bill-ah hi chuan Minister dangte proposal dang emaw an nei lo turah ka ngai deuh a. Tun hmaa Legislation kalpui dan ka hriat dan kha a dik ve turah ka ngai a; an sawi ngai lo a ni, a tlangpui chuan. *Official Bill* a nih avang khan, minister ten an sawi lo tura ngaih a ni. Member zahawm takte tan chuan an privilege a ni a, an sawi tur a ni a. Kha kha mak ka ti deuh hlek a, Chuvangin Pu Speaker, kha kha engnge a awmzia min hrilhfiar thei sela. *Official Bill* a ni a; *Private Member’s Bill* a ni lova. Chuvangin, Minister hrang hrangin an duhzawng emaw, proposal thar ang zawngin emaw an sawi kha a mak ka ti deuh hlek a. Kha kha tihdanphung a ni em? Min sawifiar sak sela Kkan hriatna te pawh a zau phah thei a tiin ka request a ni.

Tin, he Bill hi a tha ka ti a, District Council-a introduce ve dan te kan ngaihtuah ngei ang a. Chuti hunah chuan kan sawrkar puihna, min finchhuahna kan mamawh ngei dawn a ni. Chu chu ka request lawk nghal a ni e. Ka lawm e.

HON. SPEAKER : Sawi duh dang kan la awm em? Aw le, Pu H. Lalzirliana ilo sawm ang.

PU H. LALZIRLIANA : Pu Speaker, ka lawm e. Vawiinah hian Bill pawimawh deuh mai, “*The Mizoram Water Resource Management & Regulations Bill, 2024*” putluh a nih hi a lawmawm ka ti a. Ka han chhiar ve a, a tirah chuan ngaihdan tlem ka han nei deuh a. PHE Department a awm a, Irrigation Department a awm a, RD lam pawhin heti lam hi an buaipui bawk a. ‘A buaipuitu kan tam luai luai chuan a buaithlak ang a..’ tihna deuh ka nei a. Amaherawhchu, regulation leh a management

lam a ni hi a lawmawm ka ti a. Chu chuan heng department hrang hrang tuna kan lo neihsate tangkai zawk leh, ‘hand-holding’ kan tih ang deuh khan thawh hona tha zawk hei hian a kalpuia, he Dan hian a thuai ngil chuan, tha taka thawk ho thei turin goal thuhmun, target thuhmun neia a hruai theih chuan, a ropui dawnin ka hria a ni. Tunah chuan ‘Bill’ mai a la ni a, vawiinah kan pass ang a; *Act* leh *Rules* te la siam tur a ni a.

Professor Nitea, Minister zahawm takin a rawn sawi, a *source* lam hi a pawimawh a ni. Tunah hian ground-water chu a awm mai a. Tin, surface-water pawh, ruah a han sura, monsoon te kan nei thata, ruahtui tla te kan nei that chuan, kan nei tha mai a. He mi, a *source* hi kan buaipui a ngai khawp mai a. Chumi a *source* kan buaipuina tura pawimawh em ema ka hriat, nikuma he ground-water chungchanga deliberation, he House chhunga kan neihah pawh khan ka sawi ve a, ka tui pui bawh a.

Tui-harsatna hi khawvel hmun tina kan neih a ni tawh a, Kauveri Water Dispute te phei chu a awmna a rei tawh a, Karnataka leh Tamil Nadu ten Kauveri Lui an inchuh chungchangah. Chuvang chuan, khawvelin a buaipui tawh a, tun atanga hun rei lo teah hian khawvel leh he India ram, keimahni state ngei te pawh hi he *water-scarcity* hian min la chim nasa em em dawn a ni. Chuvang chuan, a conservation-a hi a pawimawh a, a source siam hi a pawimawh a ni.

Chutah chuan, tlem ka han insawilut ve lawk ang a. Kum tinin Mizoram-ah chuan tui, tuifinriat leh lui lian ina a luanpui hum hum kan dawl zawh sen loh kan nei a ni. Thingtlang hmun hrang hrang hi vawiin niah hian *tui-harsatna* (tun hun ang thalah hian) kanni vek a; tui dawng lo erawh kan ni lova. Tui hi kan dawng tha em em a; amaherawhchu a *dah-khawlna* kan nei tlat lo. Chu chuan a tawpah khuta tanga solar-a pump chhoh a lo ngai dawn ta a, chu chuan vawiinah harsatna min siam a ni chauh zawk a ni. “*Rain-water harvesting dam* hi district tina kan la model tur a ni” tiin, Pu Laltea te nen Construction of rain-water harvesting dam (Tuidai) kan siam a, hei hi kum 2 chhung eng emaw chen ka buaipui a. Central-ah *Jal Shakti* Minister Pu Sekhawath-a te, Secretary-te pawh ka zuk hmu a. Tichuan, ‘Brahmaputra Rejuvenation’ an tih department-ah te min tir a, chutiang chuan nasa takin kan tlanpui a.

Tichuan, Governor leh kan Chief Secretary hnenah pawh kan correspondent zawng zawngte leh kan hmalakna te hrilhin, chutiang chuan, ‘hei hi hma min lakpui teh u’ te ka ti a, kan Governor nen Mizoram House Delhi-ah darkar 1 dawn inkawmna hun neiin, ka lehkha pawimawh zawng zawng leh hma ka lo lak tawhna te hrilhin, chutiang chuan ani pawhin min tuipui a, aniin *Jal Shakti* Minister hnenah lehkha te thawnin, kan paper pawimawh zawng zawngte a thawn thla a. Aniin a rawn chhang a, Shillong-a *Ministry of Water Commission*-ah lehkha an rawn thawn chho a, chu chu kan Shillong DRC, Pu Chhanhima hnenah hei hi min lova bawhzui sak turin ka ti a, ka ngen a, aniin a lo bawhzui a. Chutiang chuan a han kal kual a han kal kual a. (Pu Speaker, tlemte; sawi tur a tam vak tawh lo maithei a, minute hnih-khat lek ka dil belh teh ang che.)

Chutah chuan a kual a kual a, Mizoram - Irrigation Department-ah a rawn chhuak chho ta a. Pu Laltea-te nen hian a hmunah te zuk kalin, concept note te kan siam a, chutiang chuan rain-water harvesting (a tira kan rilru takah chuan) Shillong Ward's Lake type ang deuha project siam chhoh kan tum a ni. Amaherawhchu, *Jal Shakti* Minister khan, "amusement park lam hi chu kan purview a ni lo ve; a rain-water harvesting hrim hrima hi a concept note lo siam tha leh ula" tiin advise min pe a, chutiang chuan siam thain, kan haw nal nal a, kan submit tha leh a ni.

A tawpah chuan vawiinniah hian Irrigation Department hnuaia khawih turin NABARD funding hnuaiah 29.4 crores vel dah niin kan hria a, (hei hi allocation a la awm chiah lo mai thei a) hei hi ka dreams ah chuan - district tinah hian model a la ni dawn a, district tinah hetiang type hian kan siam a ngai a ni. Ruahtui tha kan hmuh hi a dahkhawl-na-tha kan neih si loh chuan, engti zah pawh hmu ila, a tawpah harsatna tho tho kan tawk dawn a ni. Hmun tin hi lui tui kan nei lo a ni lova; amaherawhchu, retain lohin min liam san zel a, a tawpah kan buai leh thin a ni.

Chuvangin, hei hi a *source* pakhat a ni ang a, chu chuan hmasawnna hrang hrang - irrigation, horticulture, agriculture engkimah min pui nghal dawn a. Hetiang hi a nasa zawka kalpui ni sela, chu chuan a source a keng bawh ang a, chu chuan mipui tan - agriculture, horticulture-ah nasa takin hma min sawnpui ang a, kan economy a khawih dawn a ni. Chuvangin, he project kan siam meka pawh hi kan Minister zahawm tak khan min hriatpui niin ka hria a. Hei hi a theih anga ranga min tih-hlawhtlin sak pawh ka duh hle a ni.

Ka sawi ang khan, district tin hian kan tih chhuah zel, kan tihtam tulh tulh hi a la pawimawh dawn a, chu chu model atan, keima personal capacity pawhin central thleng thleng pawhin ka zuk um zui ve a, chungte chu han sawikaina chance niin ka hre ve a. Chuvang chuan, he Bill hi pass ngei turin ka support e.

HON. SPEAKER : A lawmawm e. Sawi tur dang kan la awm em? Aw le, Pu Lalthandama Ralte, Leader of the Opposition i lo sawm ang aw.

PU LALCHHANDAMA RALTE, OPP. LEADER: Pu Speaker, Ka lawm e.

Hei, vawiinah, "*The Mizoram Water Resources (Management & Regulation) Bill, 2024*" kan Minister, Irrigation & Water Resources changtuin House-ah a rawn pulut hi lawmawm ka ti a. Mizoram kan kal zelna tura tana pawimawh tak hetah rorel khawl kan nih anga kan ngaihtuah tur leh, chumi atana tul bill kan han ngaihtuah thei te, a changtu Minister-in a credit, sawrkar hmasa ruahmanna thui tak lo kalpui tawhtu a han pe te kha a lawmawm ka ti a. Kan House che vel leh kan thusawi duh dan te a mawi ka ti a, ropui ka ti a, a hmasain a changtu Minister chungah lawmthu ka sawi a.

Kan ngaihtlak tak ang khan, water-management lam hi a buaithlak khawp mai a. Ka ngaihtuah let a, tlemte han sawi lawk ka duh chu - Sawrkar hmasa Council of Ministers-ah te pawh kan ngaihtuah lai te leh, he bill, a bul tan chhoh lai te hian a related department hote pawh hian meeting tum tam tak an nei a, an sawiho thin a, thu-inchuh, ‘tute perview ber nge’ han tih te pawh a awm a. ‘PHE hi tui lama a *major* ber anni em le’ han tih a awm laiin, anni hi chuan lui tui te leh riverine thil dang tam takte an khawih deuh a. Tin, Land Resources, Soil & Water Conservator Department te hian ‘eng emaw chen chu kan mawhphurhna a ni’ an ti a, han sawi dawn chuan sawi theih kha a lo awm baw a.

Amaherawhchu, vawiina a rawn puluttu ber department hi a hming te pawh thlak a ni ta a. Tunhma te kha chuan ‘Irrigation Department’ tih kha ni a, an hming pawh lian zawk, awmze nei zawk, vawiin nia kan bill han pulut thei tur ang ngei hian duan chhoh te pawh kha a lo ni a. Chuvang chuan, heng bill a lokalna tur, a kalkawngah pawh pawimawh awm hrang hrang - Fisheries Department te, Agriculture, Land Resources Department te, Public Health Engineering te, Commerce & Industries te pawh hi an mamawh tel vek avangin, inrawn-khawmnaah an tel a, Environment & Climate Change Deptt. te, Mizoram University kan mithiamte nen pawh sawiho tel vek a ni. Hetiang zawng zawng atanga lo kal chhoa, he Bill hi ‘kan ram kal zel tur atana pawimawh’ tia lo sawi kha a ni a.

Sawi ang khan a final draft kha 5th April, 2023 khan peih a ni a. Amaherawhchu, Law leh thil dang dangah te kal kuala vetting te kan neih hnuah 27th September, 2023-ah khan Cabinet-in hei hi kan passed a. Session koh leh te a rem lova, duhthusamin thil fel kan han thlir chungin, fel tawh lote pawh a awm mai thei a, *Ordinance* te siamin a lokal chhoh ta a. Ka rin dan chuan, tun kan ministry thar pawh hian tun Council of Ministers meeting-ah, Government Bill anih dawn chuan an thlir ho leha, eng emaw chulmam ngai te pawh an rawn chul mam kan ring a. Amaherawhchu, Dan reng reng hi han siam pawh hian a hnu lawkah amend ngai hi a awm fo mai a, keini ngei pawh hun hmasaa ngaituahna pawh tel mah ila, vawiinah pawh hian point pahnih-khat hi chu a changtu minister-in a rawn clarify atana han zawh belh duh te pawh ka la nei fo tho a.

Vawiin niah khawvel sik leh sa inthlak danglam avanga tuihna han kang te, a bik takin leilet lam chawmna tur tui han tlem tial tial te, kan lo neitute nasa taka hengin a nghawng avanga vawiin niah he Bill hi pawimawh ta zual “*The Mizoram Water Resources (Management & Regulation)*” kan neih te a lo tul ta a ni.

Tin, ka sawi leh duh chu - he Bill hian tuihna humhalh piaah lamah hian, leihnuai tui laiichhuah ang chi te, a duh duhin drilling machine, khawl lian hmanga sumdawngtute’n emaw lei an verha, tui an la chhuaka, Control Act awm mumal tawh lova a han kal pawp pawp hian, hun lo kal zel turah tui-mamawhtu tam zawkte tana

tangkai zawk tur a *source* lian zawk a lo chhiat chuan, kan kal zelna turah harsatna a awm thei ang a; chutiingin drilling lam titute pawhin an tih dawn pawhin dan hnuaiah thlap phalna neia, tax pek ngai te, sawrkar tan pawha resource awm thei turte pek a nih theihna turin control act mumal tak a awm hi a tha kan ti a ni. Tin, drilling piaah lamah chuan tuichawi, tui-phur motor neitu Association thleng te pawhin hengah hian biak kuala, heng thilah hian awmze nei zawka kan kalna tur te pawh hi kan sawi tlang a ni.

Ka sawi tak ang khan hun tlem a lo kal ta a, eng emaw kan Bill ah hian han hriat fiah duh deuh lai ka neih hi a concern Minister khan min lo chhinchhiah sak tura ka duh chu –

Pakhatnaah chuan - Sub-Section 4 of section (phek 4 – 8) leh sub-Section 5 of section (phek 6 - 10) te kha, thuneihna inang duh lek lek, State Level Committee (MISWARC) aiin District Level Committee a te zawk em tih te, WARDMA kha a committee te zawk a niang chu, Chief Minister leh Chief Secretary ho committee ang te kha, thuneihna kan pek kha a inang lek lek mai a. Chu chu hun lo kal zel turah enchian deuha, line pakhat sub-section 5 of section 6 tawpah khan ‘with the approval of the MISWARC’ tiin, line khat lekte hi belh ta ila a tha ang em; nge, tihian a fiah tho ah kan ngai em tih te kha kan Minister khan a windup hunah han sawi thei se ka duh a.

Pahnihnaah chuan - Sub-Section 4 of section 3 (page 7) ah khan tui supply chungchang tarlan a ni a. Khatah khan, ‘hei hian tui in tur lam nge a kawha, lo neitute hman tur’ tih kha, ‘tui’ tih tawp khan a awm a, nakinah chuan tui in tur hi PHE subject a nih avangin. Nichinah pawh khan PHE Minister-in a sawi lawk lai te kha a awm ta a ni. Nakinah hun a lo kal ang a, kan department officers te karah hemi chungchanga thu-inchuh awm theiah hian, eng emaw lai tih chian ngai - tui control tu ro-ro ah khan Dan hnuaiah a la awm theih avangin, helai hi tlema han tihchian emaw, rules kan siam hunah chulai chu awmze nei zawka kan mention te pawh kha a tha ang em le, tia rawtna ka nei a.

Pathumnaah chuan - kan PHE Minister (RD Minister ni baw) in a rawn sawi section 9-naah khan, District Water Resource Committee-ah khan RD Department hi tun hunah hi chuan MGNREGS ah leh PMJVKSYS hnuaiah hian tuihna siam kawngah hian nasa taka thawka contribution lian pui-pui an neih avangin, District Level Committee tur department kan siamah khan kan PD-DRDO te hi tel sa ta se; Chairman-in a sawmte ‘co-opted’ tih kha chu tih theih tho mah ni se, a bik takin vawiin nia a taka kalpuitute annih avangin, hemia han insah tel kha a tha ang em le, te ka ti a.

Tin, khami dawt, a hnuaia lama Member Secretary tur (district) kha a rawn dah a. Member Secretary tur kha ‘IWRD, PHE’ tiin a awm a. Nakin lawkah chuan Dan hi kan han hmang dawn ang a, inchuh a awm thei dawn a. IWRD hi chuan district zawng zawng hi an la cover lo deuh niin ka hria a, PHE hi chu district tinah EE te emaw an thu ta a. Chulaiah chuan, kha district level-a Secretary tur pawh kha nakinah mumal zawka

kan la siam tur rules ah khan, kan govern dan tura kha la clarify chian deuh loh chuan, helaia a *principle* kan pass hnuah hian tihfel tur a la awm dawn niin ka hria a.

Tin, lawmawm deuh mai pakhat chu - clause (b) of Section 13 (phek 1 – 14) ah khan tui lama harsatna a lo thlenin WARDMA, a bikin sawrkara kan hnathawktute mawhphurhna lian zawk, duty tam zawk a pekna lai kha a lo awm a, kha khan kan hnathawktute a tiphurin, challenge lian zawk a pe dawn niin ka hria a, lawmawm ka ti hle mai.

A tawpna atan chuan, Pu Speaker, Bill tha tak te pawh pass pawh ni ila, a *implement* hi a pawimawh lai anih avangin, i dinglama leh i veilama thute helaiah hian kan tanho a tul tak zetin ka hria a, Dan tha tak tak kan siam tawh, hman lutuk loh te a awm fo avangin. Tin, mipuite hian chu Dan tha kan pass chu an hriat theihna turin public educate pawh a ngaiin ka hria a. Chungah chuan kan platform neih remchanna na atangin public education pawh hi kan neih tlan a tulin ka hria a. Hei hi kan tu leh fa, thang leh thar lo kal zel tur atana thil pawimawh a nih avangin, vawiina “*The Mizoram Water Resources (Management and Regulation) Bill, 2024*” hi he House zahawm takin kan pass ngei turin ka thlawp a ni e. Ka lawm e.

HON. SPEAKER : A lawmawm e. Sawi tur dang kan awm tawh loh chuan, kan House Leader i lo sawm ang.

PU LALDUHOMA, HON. CHIEF MINISTER: Pu Speaker, kan ram administration-a department kalhmang hi a buai em em mai a, tui chungchangah hian department 4 in thu an nei a - Land Resources Soil & Water Conservation Department kan nei a, PHE kan nei a, Irrigation & Water Resources Department kan nei leh a, Soil & Water Conservation Department kan nei leh bawk a ni. Department 4 hi tui kaihnhawihah kan nei a, Dan siam pawh a har tur reng a ni.

Chuvang chuan, transaction of business hi la ennawna, heti teh nuai lo deuh hlek - single nodal agency, single department hnuai emawa dah dan kan la ngaihtuah loh chuan kan buai zel ang tih a hlauhawmin ka hria a. Heng Department 4-te hi Minister hrang hrangin an chan phei chuan a buaithlak leh zual a. Minister pakhat kutah han dah dawn ila, dah sen chi a ni lova, a lian em em mai bawk si a. Chuvang chuan, tunah hi chuan kan nih-nihin kan ni ang a, kan kal-kalin kan han kal phawt ang a; hei hi chu transaction of business rules zawk lam atanga rawn chinfel dan hi awm sela tha kan tih theuh ka ring a. Chu chu nakin lamah a la ni ang a.

Tunah maiah pawh, PHE in hmanni lawkah Dan an nei a, chu nen chuan a insu buai dawn em/dawn lo em tih hi he kan Bill hian a rawn take care em, ka Chiang Chiah lova; khatiang te kha a ni nghal a. Tin, he Bill hi Council of Ministers-in kan ngaihtuah lai awm ka hre lova, (ka lo hre lo palh pawh a ni maithei a) Council of Ministers hmasa in

a lo pass tawh kha kan ring mai te pawh a ni maithei. Chu chu department zawng zawngte pawhin lo hria sela; sawrkar hmasain a lo pass tawh kha, sawrkar tharin ngaihtuahna thar atanga tihdanglam duh a nei maithei a, rin nghal thuai thuai lo deuh kha ni se a thain ka ring a.

Tin, he Bill bikah phei hi chuan tun sawrkar thara han tih vak tur a awm lova, a hmasain an lo tih tawh sa a hun a lo thleng a, hetah a lo lut a ni mai a. Chuvang chuan, sawrkarna reng reng chu inchhawm chho zel a ni a. Thil tha a nih phawt chuan, hetiang hian kan inchhawm zel tur a ni a. A ngaihtuahna sengtu leh hma lo la nasa tak tak zawk chu ‘kan sawrkar hmasa te anni’ tih kan pawm em em a ni.

Amaherawhchu, Bill hi department-in rei tak a han chai a, chumi hnuah Law-ah an han *vet* leh a, chutah, hetah a lo lut a. Keini legislator te hian he Bill hi eng emaw chen kan riahpui theuh tawh a, kan lo thlir chiang theuh tawhin ka ring a. Legislator hovin zan hnih-khat lek lo zirna hun kan nei a, helaia kan han chai hian thil fel lo tam tak kan hmuchhuak zung zung zel mai hi, kan department te hi hei ai hian legislation thilah hian fimkhur se ka duh hle a ni. Tun hma pawhin ‘hei hi chu *patent error*-ah ngai mai ang u’ tih te, *grammatical error* te a awm a; vawiinah pawh khang kha kan hre nual a ni. A thente phei chu ‘i pass lo mai teh ang’ tiin, ‘select committee’ kan ti em ni kha, eng nge ni kan pekna thin kha? Aw.., ‘Select Committee in lo zir phawt teh se’ tia pass lova kan hnawl liam te pawh a awm thin a. Chutiang rawtna te chu a awm lem loh avangin, vawiinah chuan kan han pass phawt mai turah ka ngai a.

Amaherawhchu, amendment tih vat chu a ngaih ka ring a. A bik takin, kan Leader of Opposition-in a point a rawn sawichhuahte kha a valid em em a ni. Nakin lawka buai leh theihna te a awm hmelin a lang a. Tin, Dan dang kan neihsa, department dangte nen ‘a insu buai ang em’ tih te pawh ngaihtuah a ngai a. Eng emaw a neuh neuha kha chu a rules lamin a take care mai theih tur anni hlawm ang a. Amaherawhchu, a rules ina a chulmam sen loh chi te pawh a awm hmel hlein a lang a. Mahni hma zawn te chauh department-in kan thlira, department danga kaihnawih thlir mang si lo te hian Dan kan siam a, a hnuah a buai a, kan amend leh a; amendment hi kan ngah em em a ni. Chutiang chu a nih avangin, ‘fimkhur thei ang berin Bill hi buatsaih theih thin ni se’ tih kha general takin kan sawi duh hrim hrim a.

Tin, tuna kan Bill ina a rawn take-care tur ang chi mamawh ngawih ngawih kan nei a. Kan sawi ang khan hmanni lawkah pawh dragon fruits chinna hmunah kan kal a, tui lak dan tur kan han thlir a. Ral lehlam ami, mi-khaw ram ami daih kha kan kawkw mai a ni. Han la ngawt dawn ila, thuneihna kan nei em; kha khua khan eng thuneihna nge a neih; khang te pawh kha tunah hian Dan tlawhchhan em em tur kan nei lova, kan ni nawk nawk ringawt mai a. Mi rama tui la hi kan tam em em ringawt mai a ni, thingtlangah hian. Chungte pawh chu a rawn chin fel tur a ni a. Tin, water source kan neih preservation te, a source humhalh dan - a mapping te kha a pawimawh em em ta a.

Hei, underground water kan han explore a, thenkhat chuan, “hei hi in khap vat loh chuan kan tui a kang dawn ania” an ti a ni. Thenkhatah erawh chuan, “a tam lutuk, horizontal zawng pawhin a verh chhuah teuh theih; ren tur a ni lo; kan fur ruahtui hi a tam em”, an ti a, keini laymen chuan engmah sawi tur kan hre lo a ni. Khang te kha anih avangin, khang zawng zawng rawn enchiangtu tur anni a, mapping kan neih khan kan potential te pawh kha kan hre dawn a, chu chu thil pawimawh tak a ni hrim hrim a.

Tin, kan pi-pute hun lai khan, “tui hi mi zawng zawng ta tura Pathian siam, khuanu siam a ni a, pumbilh tur a ni lo” an lo ti a ni. Tuin emaw a compound-ah emaw, a loah emaw tuihna a nei a, a ta neih tlat mai a, midang hman a phal ve lova, ‘chutiang tuihna chu a tlem tual tual mai a ni’ an ti a ni. Chuvang chuan, “a tlantu an tam poh leh tuihna hi a pung a ni” an lo ti a ni, kan pi leh pute khan; hengte pawh hi a dik mai thei a. YMA ten park an nei a; ngaw kan siam a, a lawmawm a; kan thawlh thin a. Mahse, mithiamte chuan ‘thawlh loh tur a ni’ an ti a ni. Kan thawlh hian perhte leh neuh neuh, khatiang tui lo retain tu kha a bo a, khang a hnuaia a pik te te leh eng emaw tel lo khan tui hi a luangral chak bik ni tein an sawi a, kan hre ve lova.

Engpawh nisela, Pu Speaker, han pass phawt ila, a department la chinfel dan te leh, hemi kan Bill han siam tur leh kan Dan lo neih sa tawh te nena ‘inkalh lai a awm em’ tih te a tlachawpin kan la zir zel ang a, kan han practice phawt ang a. A tul ang zelin amendment te pawh kan la tichho turah ngai ila, han pass phawt mai kha a tha e a.

HON. SPEAKER : A lawmawm e. Tunah chuan kan Minister zahawm takin a Bill windup-a, House pass-pui dil turin ilo sawm ang u.

PU PC. VANLALRUATA, HON. MINISTER: Pu Speaker ka lawm e.

Hei, vawiin niah Ninth Legislative Assembly-a Bill hmasa ber turin, “*The Mizoram Water Resources Management and Regulation Bill, 2024*” ka rawn pulut a ni a, i remtihna in House-ah Member ten sawihona tha tak mai kan nei thei a, ka lawm hle mai.

Vawiinniah hian kan ramin a mamawh tak mai Mizoram-a kan tuihnate, kan lui leh kan tuikhur neihte thleng pawh a ni ang a, hengte enkawl na tur atana Dan kan la neih loh kan han nei ve dawn a ni a. Chu chu, vawiinniah hian member 8 lai maiin a thlawp zawngin an rawn sawi a, ka lawm hle mai. Member thenkhat ten an duh tawh lohna laite an rawn sawi thliah thliah te pawh ka lo chhinchhiah a. Nakinah rules siam a nih hunahnte la en that atan kan lo chhinchhiah a ni.

Kan sawi tak ang hian, he Bill hi department pakhat ta a ni lo a, department zawng zawng intawm tur anih avangin, a Council sang ber-ah pawh Chief Minister Chairman-

na hnuai a ni dawn a. He Bill neitu chu department zawng zawng kan ni turah ngai ila; Mizo-fa, Mizoram chhunga awm zawng zawngte tan a ni ang a.

Chuvang chuan, he Bill hi duanchhuah anih lai pawhin mithiam tamtakhte sawm niin, fimkhur taka kalpui a ni a. A famkim-lohna lai erawh chu a la awm ang, amendment pawh a la tih theih zel ang a, Rules lamah pawh la umzui tur a ni dawn a ni. Member ten tha takin min thlawp avangin lawmthu ka sawi a ni.

Tichuan, Pu Speaker, “*The Mizoram Water Resources (Management and Regulation) Bill, 2024*” hi he House zahawm tak hian min pass-pui turin ka rawn dil e.

HON. SPEAKER : Aw le, “*The Mizoram Water Resources (Management and Regulation) Bill, 2024*” chu House pass-pui turin a rawn dil ta ta. Tunah kan buk ang.

Pass remti apiangin, ‘remti’ ti ula, remti lo kan awm chuan, ‘remti lo’ ti bawh ula. (*Remti lo an awm lo a..*) Aw le, a lawmawm e.

Aw le, “*The Mizoram Water Resources (Management and Regulation) Bill, 2024*” chu lungrual takin he House hian a passed ta a ni. (**Pu PC. Vanlalruata, Minister:** Pu Speaker, ka lawm e.)

Hei, inzir zel kan ni a, Member zahawm tak Pu Nguna khan a hminga bula ‘C’ kan lo telh lo kha a care deuh hlek a, Pu Ginzalala pawh ‘H’ kan telh khat khawp mai a, a phun lem lova. ‘Phunchiar leh phunchiar lo hi kan awm em maw ni chu aw’ ka ti deuh a, kan lo fimkhur leh zual deuh dawn nia. Khalai te kha kan lo hmuh hmaih palh a ni e.

Aw le, vawiina kan business chu kan zo ta a, naktuk, 23rd February, 2024 (Zirtawpni) chawhma dar 10:30 ah kan thukhawm leh dawn nia.

Sitting is adjourned (12:51 PM)